



# Emmanuera

## Te Atua i buakora

Volume 2, Issue 3

KCCRS Newsletter

July to September, 2010

K a n o a n a

<i>Te Kamauri</i>	1
<i>Kaongora man NSC</i>	2
<i>Kangora mai iroumi.</i>	2
<i>Iesu n te Eukari</i>	9
<i>Te Karaki</i>	12
<i>Ana Tangira Te Uea</i>	13
<i>Te Reirei</i>	16
<i>Te Maiu ae Tabu</i>	16
<i>Tamnei Mataku</i>	18

*“kateimatoa ‘Uran Aina  
Ana Tangira Ibuakora’  
ao n tabo ake ti maeka  
iai...”*

## Kiribati Catholic Charismatic Renewal Service

Ibukin am rongorongo, taiaoaka reitaki ma  
Uriam Timiti, Fulitua Taraora, Beneteta  
Raobati ao Kautoa Tonganibeia.

Phone: + 679 3385364  
E-mail: [timiti\\_u@usp.ac.fj](mailto:timiti_u@usp.ac.fj);  
[f\\_taraora@hotmail.com](mailto:f_taraora@hotmail.com)  
[bene\\_raobati@yahoo.com.au](mailto:bene_raobati@yahoo.com.au)  
[kautoat@yahoo.com](mailto:kautoat@yahoo.com)  
Website: [www.kccrs.org.ki](http://www.kccrs.org.ki)

## Te Kamauri



Inanon Emmanuera aio ao ti rangi ni kukurei nongora aron kakamakurin te Tamnei ae Raioiro inanon ara charismatic riki iaon Kiribati. Ti karabaia tarira ma manera n aia kekeiaki ni manga kamaeua te charismatic i aonaba are e oti iai te nano ni kan reita aia kekeiaki tarira ma manera ake a moan unika koran te charismatic i aon Kiribati. Te karabaraba naba nakoia ara Tama ae te Tama Koru ao te Tama Micheal n aia boutoka ma aia botumaka ni baronga raoi ao ni katauraoia kain te tiim nako aonaba. Ti karaba naba te Uea ibukin ara kekeiaki ngaira ni karaoi tibangara aika a kakaokoro inanon ara botaki ni charismatic i Kiribati, Biti and New Zealand.

N te tai aio ao e kan kana-  
noa ma ngkami Emmanu-  
era ana wewete te Atua  
nakoirai ni kateimatoa  
'Uran Ain Ana Tangira Ibu-  
akora' ao n tabo ake ti  
maeka iai n te aro ba e  
aonga n teimatoa rokon  
ana kamaui nakoia aomata nako riki ake a bua  
man raroanako ma ana Tangira Atiniban Iesu  
ae moan te Tabu. Aio bon maten nanon te Atua  
ba kamaeuan tamneia aomata nako ao E  
weteira ba ti na kateimatoa uran ain ana  
tangira nakoia aomata nako. Ti na kanga ni  
kateimatoa uran ana Tangira te Atua? Eng te  
moani bai ae kakawaki bon te kakaonimaki ni  
karaoa ao ni maueakina kanoan tabera inanon  
ara botaki ni charismatic, riki bon kainaomatan  
te Tamnei ae Raioroi inanon maeura. Ngkana e  
inaomata ni koaua te Tamnei ae Raioroi inanon  
maeura ao ti kataua te Tamnei ae Raioroi ba E  
na kairi maiura ao ti ongotaeka ni karaoa  
Nonana n taai nako ao n tabo nako. Inaomatan  
te Tamnei ae Raioroi inanora bon te anga ae ti  
kona iai ni kateimatoa uran Ain ana te Atua  
inanora. Ngkana ti mamara inanon ara charis-

matic ao titebo ma ti kataua ba e na mate uran  
te ai anne ao ti kaotia naba ba ti aki kan  
karaoa nanon te Uea ni kan kamaiui tamneia  
aomata nako

Ti na kamurungira ni  
karikirakea te maiu n tataro  
ao ti na butia tinara Nei Maria  
ae Uean te Rotario riki  
inanon ana namakaina aio ba  
e na buokira ao e na raonira  
inanon ara kekeiaki ni ka-  
bane. Ti na reitira ni koaua n  
taai nako ma tinara ba e na taui baira mani  
kairira. Ti na bubuti naba ana katantan Tinara  
nakoa ara Berebitero ni kabane ao ana buoka  
nakoa ara roronrikirake ba a na batii aika a na  
riki ba taan tia tai n ana onaroka te Atua  
inanon te nakoa ae Tabu ao kaburean majuia.

Kam bati n raba n ami tataro ao ami kaunganano ao ami ibuouboki aika bati ake a tia ni kateimatoa otinakon Emmanuera. Ke karairoi ngkami te Uea inanon ami tai ni wareware ao ke E mmamakuri Tamnein te Atua inanora ni bane n aki totoki.

# *website facelift*

E a tia ni koro ngkai teuana te ririki imuini moan waakin ara website ae kccrs.org.ki n te 15 Aokati 2009. Ti a reitira n neboa te Uea ma ni kamoamo ngkai E a tia ni kakawakina ara website inanon teuana te ririki ao bon ara kataninga ba E na teimatoa ni mamakuri inanon taian kanoa ake a na toka iaon ara website ao man reke ba anga n ringgi maeuia aomata aika bat i aonaba. N reita kanikan-ean ana koro n ririki ara website aio ao e tia ni bekutata te komete are e tararua te website ni karaoi taian katamaroa (facelift) iaon te website n te aro ba e na raka ma ni boou aron taraana ao e na raka naba waekoan ao bebeben karekean taian ibuobuoki mai jai n aron are e kantaningaki.

Ti muiokea naba ara website aio inanon bain tinara Nei Maria ao ni butia ba e na teimatoa ni kataniira iaan ninirana ba ti aonga ni kakaonimaki ma ni marurung ni karaoi tibangara ibukin Natina ae Iesu rinanon te website aio. A bia reke naba taian katamaroa inanon te website ba ara bai n tangira ae boiarara nakon Tinara inanon ana rekenibong n 8 Tehetemba, 2010

[www.kccrs.org.ki](http://www.kccrs.org.ki)



## Kaongora man NSC

*Ian Namakin, Tia Babaire.*

Ti na teimatoa ni kakaraba te Uea ibukin mamakurina inanora n te bong ae koraki. Tariu ao maneu ti bon kamoamoa te Uea n ana babaire are E a tia ni baireira nako iai inanon ara waaki, riki ni karokoa te maeu ae e Onraken te Maiu ao te rongorongo ae raoiroi iaon Tarawa ao ai aon abamakoro.

Inanon moan rineakia kain ara tai-bora ao aikai ngaira ni kabane:

- Kantarawa Yeeting- Ara tia Koroboki
- Tiria Riwata - Ara tia Mane
- Toom Tiime- Ara kauoman tia Koroboki
- Ioane Teingoa- Ara kauoman tia Babaire
- Ian Namakin-Tia Baibaire
- Fr Koru Tito- Tia Reirei

I n a n o n banen Turai ae nako ao e a tia ni waaki ara taibora ma kanon iango aika moan te batibukin kakamakuran te tamnei ae raoiroi iaon Tarawa n aron aikai:

Te reitaki n Tutia ao ni kainaomata irouia tarira ao manera ake a tia ni kooti. N te tai aio ao e kan bubua aika a tia ni kainaomataki irouia kain Bikenibeu, Nawarewere

MOH, Teaorareke ao Betio. E rangin kakukurei mwiin aikai ao ti rangin karaba Fr Koru ibukin reitakira ma ngaia ao riki ana boutoka ae e rangin korakora nakon ara botaki iaon Tarawa.

K a w a r a n aonaba n aron are e a tia ni baireaki ba a na kawaraki inanon te ririki aio. Makin ma Butaritari ao Nonouti ma Kuria a tia naba ni kawaraki inanon moan te ririki ao ngkai e a manga tei te mananga n taabo aikai, Marakei ma Maiana a na karaoaki irouia kain Bikenibeu, Abaiang ma Tarawa Ieta irouia kain Teaorareke ao Kuria ma Onotoa irouia kain Betio ao e a tiba roko naba te bubuti ibukin kawaran Nikunau ma e a tia naba ni moti n ara boowi ba a na rineaki kakauoman man Parish aika teniuia aikai ba a na kawara ikekei inanon October. N te tai aio ao a tia ni mananga kain Bikenibeu nakon aia Abamakoro ao iaon kawaiia kain Teaorareke ma Betio ni mananga nakon katabeia aio. Iai naba te mananga iouna ara kauoman tia baireire are e a tia ni mananga nako Onotoa ibukin kainaomatakia teningaun tabun ake a tia ni kooti ao e a tia naba n oki. A tia naba ni kawara Nonouti Fr Koru ma Tiiria ao Meeta

ibukin naba te kainaomata ao a tia naba n okirikaki. Kabane mane aikai e bon kabakaki man manen NSC. Ima in mananga aikai ao Betio e a tia naba ni kawara Tarawa Ieta ibukin naba te Kainaomata ao aio are e kairaki irouia kain Tirotama te Eti.



A tia naba ni katebenakoaki tarira ma manera aika onoman maitia man Parish aika teniuia aikai ibukin tararuan te Karea. Te koraki aikai a tia naba ni karaoaki aia workshop ioun Fr Koru n raonaki irouia riita ma ake a kan reirei iaon ana karea te Tamnei ae Raoiroi. Ti karababa naba ibukin reken te rereua irouia ara koraki inanon Tebetemba are e waakinaki naba iouna ara tama.

N te tabati ae nako ao a tia naba n reke ake a na ibuobuoki ibukin kabutan Emmanuera iaon Tarawa ma Betio ao koraki aikai bon mai Bikenibeu ao Betio ake a tauraoi moa n te tai aio. A tia ni waaki ma te Tama iaon tabeia aio. Ao ngkai e kantatingaki butin Emmanuera Newsletter n te tai are e tauraoi iai.

E bon teimatoa naba te kakamakuri iaon Tarawa Teinainano ma Betio n reitaki ma aonaba ni karaoi tibangaia aika a kakaokoro ni karokoa te maeu riaan auti . Aikai ana tangira te Uea ae e rangin korakora.

E batia iango nakon taaia aika ana roko ma bon te Uea te tia kakoroi bukin iango aika ti iangoi Ibukina n ara tataro ma ara kakaonimaki.

### E RABA TE UEA

## Kaongora mai irouumi

### **Kaongora man St Padre Pio**

*Mai ioun nei Beneteta ao Uriam Timiti, St Padre Pio, Suva*

1. Te Marooro ma Taama n te MSC i Corpus Christi i Nasese Suva Fiji

N te bong ae 14 n Tebetemba ae bon te Kauabong ao ti a mananga ni kaea te kakao nakon aia boowi Taama man te MSC n aia tabo ni kataneiai taan reirei n te Kaatorika ae Corpus Christi n te tabo ae Nasese ae bon makoron Suva i Biiti. Niman ngaira ni mwananga man te baeriti are ti mena iaana ae arana Santa Akineti man mwakoron Suva ae Nabua. Iai raora ba taangaia Eroni ao Vosita, Thomas ao manena ae Yvonne (bon I Biiti uaakai),ao ngaira Ikiribati, Uriam ao ai ngai.

Te marooro are ti a kaoaki nako iai bon te marooro iaon iango tabeua mai irouia kain te baeriti ibukiia Taama ma aroria n nakoia ni Berebitero. A bon tangiria Taama ni kan ataia ba tera ae a tangiria aomata ba a na nooria n aroria? E raraba nanoia ara Tama man te MSC ni



kan kakaea raoi ba tera ae a tangiria aomata ibukiia? Bon ara tataro ao ara bubuti ba e na reitaki nako te aeka ni mamarooro aio ba e aonga n nakoraoi aron ara reitaki ngaira taan onimaki ma ara Taama ake a katabeaki ibukin maeun tamneira ma waakin ana makuri te Uea iaon te abea.

Taama ake a ira te marooro aio bon Taama tabeman man te MSC ake a roko man abaia aika a kakaokoro iaon Tebetebek. Iai Taama mai Samoa, iai mai Tonga, iai mai Nauru. Iai naba mai Futuna ao Matiare ma Chuuck n te FSM. Bon iai naba mai Itare are aia mataniwi kain the MSC in the Betebeke ao bon te mataniwi naba ibukin te MSC ae banin n te aonaba. Ti kukurei naba ba iai mai abara ae Kiribati. Taama mai Kiribati ngkanne bon te Tama Ioteba Kanono, te Tama Patrick Teitintau ao te Tama Ekenasio man te baeriti ae Teaoraereke. Te Tama Tatieru e bon tei ibukin Nauru riki ngkai bon ngaia ae e tabe ma te aba aei. Iai naba ngkanne Taama ake a ira te marooro aei bon mai iaon Biiti. Bon Taama naba ngaiia n te utu ae te MSC. Iai ara Tama mai Kiribati naba ake a makuri ikai aika te Tama Martin Everi ao te Tama John Ikataere ao ai te Tama Joe Kani-meia. Ti bon kakaitau ao ti karaba te Uea n reken te manga kaitibo ma ara Tama aika a karineaki ioura aikai. Kain naba te maroro aio bon Taari n te MSC ake a tia ni karaoa aia kabanea ni berita.

Ti na butilia te Uea ba e na bon raoraonia ao man angania ara Tama ma ara Tari n te MSC te korakora, te marurung ao te unga n nano n taai nako ni karoan aia beku ibukin kabutaan Ueana inanon nako aia baeriti n abaia aika a kakaokoro. Ke e raoniia ao man katania Atiniban Iesu ae Moan te Tabu n aki toki, Amen.

2. Kauringan Ana Toa Santo Padre Pio 23 n Tebetemba

Santo Padre Pio bon ngaia ingoan ara botaki iaon Suva i Bitii. Ana toa e bon bakara te bong ae te Kaabong ae 23 iai bongin Tebetemba. Ti bukamarua ana bong ara Santo man moanna n te Tutia are e bo n te aoa 6 n te tairiki. Imwiin te Tutia ao ti a baroakina ana auti Uriam ao Atuna are e bon mena irarikin te umantabu i Nabua n te baeriti ae Santa Akineti.

Ti bane ni botaki n nebonebo ma ara koraki aika: ara Tama ae karineaki ae te Tama Ikataere. Iai ara irua ake a reitira man te botaki ni charismatic man ara baeriti ae Nabua. Bon teniman maitia mataa aine ake a raoniira. Iai riki ara irua ba teuare Baata Teinamati ma buna are Nei Lisa. A bon roko n reitira naakai man aia aaro are te Pentekota ba e bubuti buokana Baata man aorakina. Ti kaitaua te Uea are bon taokitan aoraki n aekaia nako ba e bon bootira ma Baata ao buna n neboa ao man kamoamoa aron ana tangira nakoia aoraki n ara tataro ni katoka

bai iaon Baata.

A bon kukurei nanora n nora ara una-in ae Nei Karee Tekaieti ma tibuna ake Samuelu ao Kamatie ao maneia Taneiti ao Rutiana ao Junior. E reke naba rokon Nei Tooti ma ana ataei ni maane uoman ake Karotu ao Kamota ao aia ataeinaine ae Nei Arieta Teaero. E roko naba Nei Kaneneia ma natina ake Ten Aata ao Nei Freda ao tibuna are Nei Laisa ao aia ataeinimane temanna mai Rabi. E roko naba Jack natin Bauro ma Etita. E roko naba Nei Karekeiti ma natina are te maane ma tibuna. Raora naba Nei Maati ma natina ataeinaine nei Reonita, Nei Turia ao Nei Philomena. Ai Uriam ao Atuna ma natia ao ti bon rangi ni kukurei naba ba bon raora naba natia are Taokita Tekeua ao ai ngai ma natiu ake Nei Karina, Nei Tiina, Ten Takuia ao Ten Otea.

Ti kukurei ngaira aine ba ti karekei ara muumuu ni matan ana kara ara Santo ake te uraro ma te mainaina. Ara kantaninga ba a na raoniira ara maane n te tai ae e na roko.


Ti rangi ni kakaitau naba ba e kangkang ara keeke are e karaoia Nei Atuna ao e koreia ara Tama ae karineaki, te Tama Ikataere. Ti bara nako imwiin 11 ma te kukurei man okiri mwengara ao e raba te Uea.

3. Kauringan ana Katabu te Tama Ikataere

Tairikin te Kaabong ae 23 Tebetemba bon te tai ae kakawaki ioura ba ara tai ngaira kain St Padre Pio n nebonebo n Tutia n bukamarua ana ka-38 n ririki n Tama Fr Ikataere. Ti bon Tutia irouna n aia auti Taama n te Sacred Heart i Tamavua. E rangi n tikiraoi kanoan ara wareboki ba te moan wareboki bon mai iroun Iobi 19:21-27. E reitaki iai ana karaki teuare Iobi bon ibukina are e moanaki ma Nanoangai, nanoangai ngkami raraou "...for the hand of God has struck me!..

"I roko n akea au bai ao N na oki naba n akea au bai...!!!" e rangi n titikiraoi karakinan teuue Iobi ba e bon kauringiira Fr Ikataere n aron karakinana are e taekina iai ae e kangi Iobi 'I roko n akea au bai ao N na oki naba n akea au bai'. Nara katituaraoi ao ti karabwa te Uea ba e a tia n anganiira raoraora, tarira, manera ao tamara ae Fr Ikataere ba te katooto raoi n aron te maeu ni kainnano ao ni mangori. E raba te Uea. N te Ewangkerio ao e karaki Santo Ruka ni karakina kanakoaia naake 70 n kaka uoman ba a na rimoana nakon kaawa ake im'iaia....ao e taekina naba aron karakon maitia taan tai ma ngaia ae ti n riai n butia Uean te tai ba e bia weteia riki taan tai...ti bon bane n tataro man bubuti ibukin ana akoi ma ana tangira te Uea ba are bon ngaia ae E wewee-wete, tiaki ngaira ke? ma ara kantaninga ba tera ngke e weweteia riki ara rororrikirake (ao ti bon matauakiniia natira ma tibura ake a te-kateka imoara!!!!) nakon te nakoa n tai aio.

Ti bon rangi ni karabaraba riki ibukin ana babaire te Uea aika a moan baan te raoiroi



*"...for the hand of God  
has struck me!..."*



*Inanon moan wikin  
Turai ao e a otinako iai  
te moan rawebana man  
St Padre Pio studio are  
e atunaki n ae "E a  
roko Iesu".*

ba ngai a bon roko raoi naba Kautoa n ara tai n Tutia aio ao e bon tiba nakoira aia kamauri ngkami tarira ma manera mai Tarawa. Kam na bane ni mauri ao ke e raoni ngkami te Tamnei ae Raioiroi n aki toki.

4. Ara kanoa ibukin Okitoba ae namakaina te Rotario

Inanon te namakaina ae Okitoba ao ti kukurei ni kaongoi ngkami ae ti na bon moana ara novena ni karinea Tinara Nei Maria ibukin ana namakaina ae Okitoba ao n arana ae Uean te Rotario. Ti na bon kabuta Tinara Nei Maria nakon mwengara n tatabemanira nako inanon ana namakaina aio ngai a bon ara bubuti ba kam a raoniira n ami korona ma ami Rotario n uringia ara Taama ni kabane ao riki ara Tama aika i-Kiribati i aon Biti ma New Zealand ao tabo ake a mena iai. Aio boni ngaia maten nanon tinara Nei Maria. Ti a reitaki naba ni butia Tinara ba e na tataro ibukiia ara roronrikirake ba a bia reireiniia ni ukera moa nanon te Uea ibukin maeuia, ao ba e bia naba kaokia ara roronrikirake ake a tia ni kiitana te aro. Ti aki naba maninga taekiai ara roronrikirake ake a taonaki n te aoraki ba e bia nanoangaia Tinara Nei Maria man bubuti ibukin marurungia.

Ti a bon reitaki ma ngkami ni kabane inanon te namakaina aio n tabekirake ami bubuti nako ake kam kan buokaki iai mairoun Tinara ae Uean te Rotario.


5. Ana moan Rawebana St Padre Pio Studio

Ti uaia ni karabaraba ao ni katituaraoa te Uea ngkai e a bon bobonga teuana riki te waki n reita aron kabutan te Rongorongo ae Raioiroi inanon taian kuna n neboneybo ao n taromauri. Inanon moan wikin Turai ao e a otinako iai te moan rawebana man St Padre Pio studio are e atunaki n ae "E a roko Iesu". Aio bon muin te kekeiaki inanon te tai ae maan ao taian kanganga aika a bat. Ma e raba te Uea ba E a tia ni kawakinira ao man anganira te tokanikai. Irian te rawebana aio bon karaohan te video are bon tamnein te kuna ae "E roko Iesu" are kanga e na reke ba te anaga ni katanoata oin te rongorongo inanon taian kuna ake a katauraoaki ba kanoan te rawerawе.

Bon te tataro ba e na reitaki nako te waaki aio ao e na reke ba kanoan ara waki n ara charismatic ni karababaa aron kabutan te rongorongo ae raioiroi tiaki ti inanon te makuri ni mitinare ma inanon naba te website ao te nutibeba.

E bon kona ngkai ni kaboaki te bana aio mai iroun te NSC mai Teaoraereke. E raba te Uea Alleluia!!!

Aio ana label  
ke ana cover  
ara CD are  
e karonakoaki  
ngkai



**Rongorongo man Santa Maria Charismatic Renewal, St Joseph Parish, Bikenibeу.**

*Nei Beia Tiim, Santa Maria Charismatic, Bikenibeу Parish*

1. Te Managa nako Aonnaba

Te kaitau



nakon Te Uea ae maiu ba a bane n roko n aia abama-koro ara tiim ni kamarurung ake teniuia. Te moan tiim are e mananga nako Abaiang e boni kairaki iroun Ioteba mai Eita ma maitia kaain te tiim ae tengaun tabun.

Te kauoua n tiim are e mananga nako Abemama e bon kairaki iroun Kaitu man te Roti ae Kamimi. Bon te tiim n roro n rikirake ba angin kain te mananga aio bon ataei n te roro n rikirake

Te Kateniua n tiim ni mananga nako Maiana, e bon kairaki iroun Tiebina mai Eita. A bon tiba managa n tokin te namakaina ae nako

2. Kamarurung inanon kaawa

Ibuakon maitin ara kaawa ake waniua (8) iaon St Joseph Parish are e tuai ni kakamakuri iai ara botaki n tataro ae te Charismatic ao a motikia kain te Taibora ma aia Tama ae Fr Patrick ba e nang waki te kamarung.

E reke St Patrick are arana ngkoa Tebukaniti ba te moan kaawa ae e na kawaraki. E karaoaki te waki ni kamarurung n te weekend n tataro. E uti ni katikaki tinara ae Nei Maria inanon te kawa ao imwina e a taorimuiaki ma te neboneybo ma ana Katokan Bai Iesu (karokoan ana tangira Te Uea) iaoia kaain te mwenga. Iai 24 maitin te bukinibai are a kawaraki mwengaia n te tai anne. Ti karabaraba nakon Uea ba e a teirake te botaki n tataro n makoro aio are e a bon kaanaki iroun aia Katekiti ae Berenan ma buna ae Nei Atinta.



Uouoa te wiiki imuina ao e a manga kawaraki te makoro ae Gasgony n te Kotiweei. E a manga boo naba te weekend n tataro ma Iesu n aia maneaba kain St Patrick. Ni karangainan te Kaonobong anne ao a uti te koraki n neboneybo n St Patrick ao imuina e a mananga te koraki nako Gasgony ike e a karaoaki iai te katiki ma tinara Nei Maria man te Umantabu i Gasgony nako Temaiku are tokin te makoro ao nako tokin te makoro nako Bikenibeу.

E riaon nimangaun te auti ake a kawaraki irouia kaain te botaki n tataro. Bon te motirawa ae ababaki te tai aio ngai a are a kawaraki n te Kaonobong ao n te Moanibong ma kanoan uaia kain te charismatic are te

nebonebo ao nikiran ana Tangira Te Uea irouia kain te mwenga n te tataro ni katokabai. Ti bon kaitaua aia Tia Ibuobuoki kaain Gasgony ae Metai n ana ibuobuoki nakoia kain te botaki.

Te kateniuia ni kawa are e kawaraki imuina bon Rurete are kam a bon reita iai ongorami mairoun tarira ao manera man te NSC ae Kantarawa n ana kaongora iaon kawaran Rurete.

Irarikin te riboti man Bikenibeu aio ao I a kan kaotia are I korea ua riboti aio mai Suva, i Biti. I kan tabeka banau ni kaitau nakon te Uea ibukin te aoraki are E anganai iaon kawaiu n okirikaki nako Tarawa are I a tiku iai i Suva. Aio bon teuana mai ibuakon ana kaibangaki Iesu are E anganai n Ana Tangira ba N na katonga inanon te maraki. E raba Te Uea ba I a marurung ngkai ao I a kantaninga te oki nako Tarawa n wikirake aikai. I karabaia naba tariu ma maneui ni kabane n aia tataro ibukiu are I a tia n namakinna n au tai n te onaoraki ikai.



#### **Te Rereua i Rurete man 20/08 – 22/08/10 irouia kain Santa Maria Charismatic Renewal, Bikenibeu**

Kantarawa Yeeting, St Joseph Parish, Bikenibeu, Tarawa.

Mauri tariu ao maneui n ana tangira te Uea ae Maiu.

Inanon te rongorongo aio ao Nna kaongorai ngkami rongorongan te week end are e karaoaki I Rurete man 20 – 21 n Aokati 2010 irouia Santa Maria Charismatic Renewal Services (SMCRS) man te Parish ae Bikenibeu. Oin te kantaninga n ana babaire te tabora ba e na roko ana tangira te Uea ae maiu inanoia ana botan aomata ni kabane te Uea aika atongaki ba KIRITIAN ma e aki inaomata ni koaua te Tamnei ae Raioiroi inanoia.

#### **Kanimabong 20/08**

Imwin kaean te tutia n te bakantaii anne are te aoa 6pm ao e a baroakinaki naba Rurete irouia ake ana matu ikekei. E bon karoko te maiti ba tao e a bon rawata te tabetabe irouia te koraki. Ara tiibi leader (Nei Beia) n te tai anne e kibanako Abemama ibukin mwiokoana naba ae kakawaki man ana tabo ni makuri. Ti karabaia tarira ma manera ake a reke matuia i Rurete ba a kakoroa kanoan te program inanon te tairiki anne. Akea kanoan te tairiki anne ba ti te nebonebo ao ai te matu naba. Te amarake n te tai anne te mooi ran ao te kabuki.

#### **Kaonobong 21/08**

Te program te tutia i Nantesi n te aoa 7am, ti karaba te Uea ba e bon reke naba kawarakina iroura. Imwin te tutia, ti a bane naba ni kaea Rurete ibukin te katiki ma Nei Maria, te Nebonebo ibukin ana taeka te Uea are e na riki ba utara ni kaei mwenga ni karokoana ana tangira te Uea. Ti katika moa tinara Nei Maria ba e na katauraoi mani kain-

gaingai nanoia ao ni kaitiakii mwenga ni kabane man ana kamangaongao te riaboro imain rokon natina ae Iesu iaani mwengaia. Te mwakoro aio ao bon ngaia naba are e korakora iai te botaki ae te ran are a tinanikuaki man te Ekaretia. E bon aki reke tain te katiki ba a tiba bane n roko te koraki aingaia are e a karaoaki naba te Rotario n te maneba ma te onimaki ba e bon noora oin ara kantaninga te Uea ma bukin iango ni kabane ao ti karaba te Uea ba e bon kakoroi bukin kantaninga ni kabane ake a karaoaki ibukina. Imwin te Rotario, te Nebonebo inanon te chapel are ti bon namakina Iesu ni koaua n te Eukari. E rangi n raraba te Uea n te tai aio ba e kaorrakeira n ana tangira ao man anganiira ana karea aika batu n aron te korakora, te ninikoria, te tangira ao a batu riki. E kakoauaki man korakoran te lanena iroura ni kabane. Ana taeka te Uea bon taekan buakanakin te buakaka ao e na tokanikai te raoiroi.

#### **Kawarakin Mwenga**

Iai group aika uoua aika kateaki ba ana group Neiti ao Kantarawa ma kaaia aika kaka itiman (7). Bon ti te tikina te waaki are bon karokoan ana tangira te Uea iaan mwenga n te nebonebo, kaukan ana taeka te Uea ma n tibwatibwaia, te bubuti ao ai te katokabai iaoia kain te mwenga. Inanon kawarakin tain mwenga nako ake a kawaraki ao ti bon kakaraba te Uea ma tinana Nei Maria n te nano n tauraoi ao ni ingainga irouia kain mwenga ni kabane ake a kawaraki. Ake a tuai ni kawaraki a kaman roko banaia n tangira naba te roko iaan mwengaia. Butin ana rongorongo te Uea nakoia kain mwenga e ura kanga te ai n te aro are kaean te mwenga teuana ma teuana bon akea totokoana ao ni katoa te mwenga nako are a kawaraki a bon namakina te kukurei, te rau ao te karabrawba ae batu.

Teuana naba ana tangira te Uea ae kamimi nakon te aine ae bon ti ana botaki ae mamate nanona iai bon te botaki n taanga (ana taanga Nei Maria). Ngke e a roko kawarakina ao e matu, ngaia are e a kautaki irouia kain te tim ake a bon rang kina te aine aio. A weweteia ni kautia ao ngke e a uti ao e a tuangaki ba e na boo te nebonebo n ana auti ni karokoaki ana tangira te Uea ni mwengana man te botaki ni charismatic. Akea ana taeka ba e a ti kangai naba, nako kakaea ami auti teuana ba I aki tauraoi ni butimaea te charismatic ba I bon riribaia. Ti karaba te Uea ba e bon korakora ana tangira ao aiaron ae kain te tim a ribu angia are aiaron ae a tuangaki ba a rin ni waakina bukin rokoia. Moan te un te unaine aio ao e a tannako n anga bukin atuna ao are e bon wene naba n aki kan teirake. Inanon tain te anene imain te waaki ao akea ba e a teirake te Unnaine



*"Ana taeka te Uea bon taekan buakanakin te buakaka ao e na tokanikai te raoiroi"*



*"Te kamimi ba inanon tain te nebobebo are e bon aki kan reitia..."*

aio. Te kamimi ba inanon tain te nebobebo are e bon aki kan reitia ao ngkam ba ngke e a kaukaki ana taeka te Uea ao bon te kamimi ba ea tau-raoi ni warekia ba ngaia e a reita te mronron n nebobebo tao inanon te tataro. Ti karaba te Uea n ana tangira nakon te unnaine aio ba man te wareboki ao e bon reke tibwan-gana naba are e tibaia are taekan te atibu ae uarereke ae tebenako man te maunga ni bakara rauraun waen te aintoa ae ababaki are atuna te koora, rabatana te buraati ao waena te biti. Ngke e baka te atibu ae uarereke aio iaon rauraun waen te aintoa aio ao e a baka naba te aintoa aio n riki ba te tano ao te atibu arei e a riki ba te maunga ae bubura. E a bon tibatiba te unaine aio ni kabara ana bure nakon Iesu ngkai e a tia n ririba ana botaki ae te charismatic ba e bon kaotia ae bon rang riri-ba mangkekei ao e aki karaka ma e moan te mimi n te bong aio ba inanon rokomi are I bon rang aki kukurei ao aiaaron ae a bon tuangai tinau Nei Maria bwa nna riai n reitingkami n neboa natina ae Iesu ao inanon uniu ao e a toki ao kanga ia rangi ni mimi bwa ngaia Nei Maria e bon tangirai bwa nna neboa natina irarikimi ao aingaia are I a bon reiti naba ngkami iai. E raba te Uea n ana tangira ao ana kokoaua are ti noria ba e makuri tamneina ae raoiroi inanora n taainako. N tabetai ao e taetae n anganiira baika a raoiroi ma ti baka n aki ongo man rokana nanora n rawa n ongo ao ngkana ti kauka nanora n angan te Uea ao e na kaonrakeira n te maiu ae onraken te maiu.

Katean te botaki ni Charismatic

Ti karaba naba te Uea n ana tangira bwa n te tai naba aio ao a reke naba tarira ma manera tabeman ake a tauraoi n riki ba raora inanon te charismatic ao n ana baire te taibora n te banin ao aio ngkanne are a mwiokoaki tarira ma manera i Eita ba a rereitaki mangaia n te Katenibong koraki ni karoakoa ae a tei aia taibora.

Bon au katituaraoi nakon te Uea ae maiu ngkai e kateimatoa ao ni kamaka mama-kurin Tamneina ae Raoiroi inanora ba boni ngaia te ang ao te korakora are e tabekira man ara tabo aika kakaokoro ma te nano n tauraoi, te nano n ninikoria ni karaoa tibangara ae kakawaki ibukia ana botanaomata te Atua aika e batu n tangiriia ni kabane ba ana katonga ana tangira ae akea tiana ao tokina.

Ko batu n raba te Uea ni katongan kaubain te Abanuea ae Karawa i aonteaba.

Alleluia Alleluia Alleluia



### **Emmanuera Charismatic, Teaoraereke Parish**

Kaoti Teingoa, Teaoraereke Parish.

Te ribooti iaon ana kamaeu te Uea iaon Teaoraereke Parish n ana waki ana tiim ni katoki aoraki n ai aron aikai:

#### **1. Nei Miriana**

Bon kain te aba ae Onotoa ao bon te Kamatu ni koaua nggia. Aorakina bon te waiwai ma ngke e koro ubui (20 yrs) ana ririki ni karokoa ngkai. E kanga n reke rokona n te botaki n tataro? Bon ana makuri manera ao tarira ae Nei Barutu Tuare ae e kaota te kawai nakoina ae ena reke iai buokana ba te Charismatic.

N tain tataroakinan Miriana n te umantabu i Teaoraereke ao inanon te karea n ataibai are e anganaki Nei Katarina are e nora boton aorakina ao ikanne are ea kamaeuaki iai. Ni kamauan Miriana ao e a nene ana onimaki ao e taku "Te Uea bon am wewete aio ao Nna irianako. Miriana e a riki ngkai ba ai te Charismatic ni koaua ao ai kain te Ekaretia Katorika imwin are e a tia n anganaki taian Takaramentu ake aua (4).

#### **2. Aato Teraure**

Aorakin Aato bon te waiwai naba ao te aki nanako taari inanon te maan ae teniuia (3) tabun te ririki. Ti karabwa te Uea n ana karea are ngia ae e a kamaiuaki iai.

#### **3. Nei Makuriita Baaro**

N ana tai ni kanganga neiei ao e kakaea buokana ao e reke buokana n te botaki n tataro ni charismatic. Ao te buoka are e anganaki e nako n te karea ni tatae-ni-burabeti are e kataratarai kanoan bong ake a na roko. E rabwa te Uea. Ao e manga kaa naba te botaki n tataro ni katituaraoi nakon te Uea n ana buoka.

#### **4. Ana auti Nei Teekua**

E kaa te tiim ni katoki aoraki Teekua ibukin buokan natina te maane ae tiku irouna te maraki ae e wara bukin atuna te iaa are e bubura. Ngkana e ikeike ao e maraki ao burona ao bukin atuna. Imain te katokabai ao e waki te Bau n Nanoanga ao inanon te Bau n Nanoanga ao manera ae Nei Makin e kaoti ana tamnei ae e noria uoman aine; temanna ae e a kara ae e tauaki baina iroun ae mata ataei riki ao a otinako man te uma ni kuka n ana auti Taia i Abaunamou. N norakin te aoraki aei bon a kaoraki teuare buakaka, ba e tibaia te ataeini-mane aei ba ngke e a manga roko marakina ao e a wetea tarina ae uarereke riki nakoina ba a na torobia. Ngke e tia n torobia ao e a kitanna ao e nako ni matu, ngke e a matu ao e a miia te kamea ae e tenaruia.

N tain te katokabai ao boni iai noran mamakurin ana karea te Tamnei ae Raoiroi irouia ara koraki inanon taian mii ma talan tamnei aika a roko.

A bon batu riki auti iaon Teaoraereke aake a kawaraki man karokoaki iai ana kamaiu te Uea nakoa ake a aoraki. E noraki naba ba a maiti mai ibuokoia ake a kawaraki aika oin aorakia bon ana makuri te te riaboro.



### ***St Faustina Charismatic, Betio Parish***

**Kautoa Tonganibeia, St Faustina.**

Ti a rimoa n neboa riki Te Uea ibukin ana Tangira ma ana Akoi, ao te kekeiaki inanon weteakira irouna ibukin kabutan ana Tangira ma ana Kamaui are E tia ni muiokoira iai.

#### **1. Te Tantani imatan Te Eukari ni katoa Kanimabong**

Ni katoa kanimabong ao a kekeiaki kain St Faustina ni kakaea te Tutia ni katoa Kanimabong i Temakin n te Umantabu are Te Kaotitaeka, are e manga rimuiaki te Tutia ni kaotinakoan te Eukari nuua ingabongin te Kaonobong. Inanon te bong ae te Kanimabong koraki ao anne naba te bong teuana ae kakawaki irouia kain St Faustina n anga nanoia n aki mamamat inanon te bong anne man te moaningabong nuua ae e boo 6pm n te bakantaa. Ti karabaia unaine ake aki toki n titiku n te Umantabu ba bon ngaia ake aki toki n ibuobuoki nakoia ara koraki ake bou ni wakina aron aia tantani ni katoa Kanimabong. E noraki naba ba e a batte roro ae rikirake ake a kakaonimaki nakon te Eukari ni katoa bong ao ni kakaraoa aia tantani ni katoa Kanimabong. Ti karaba Te Uea ibukia ataeinimane ma ataeinaine aikai, e bia teimatoa nanoia ao man ongotaeka ni weweteakia iroun Te Uea n tai nako.



#### **2. Te Rereua imain aia kainaomata tarira ao manera**

Inanon wiiki aika nako ao e nakon teningaun tabun botaia ngkai taan kainaomataki mai Betio ake a bon tia naba n ira te rereua ni katauraoi imain aia kainaomata are e karaaki n te Tutia Charismatic ma ara Tama, Fr Koru. Inanon tain te rereua aikai ao e manga bon reke riki tain rinanoakin te Kooti are Te Maiu ae Onraken Te Maiu. E bon reke riki te tai ni manga kananoi riki taian rerei ao titatiba ma taan tauraoi ni kainaomata. N te aro aio, e rangin raoiroi ba e reke riki aia tai ni kamataataia taan kainaomataki ao mani katauaraaoia raoi imain butimaean te Tamnei ae Raoiroi.



Bon iai naba kain te tiim ake a tia naba n rineaki kaia irouia kaain te Taibora aika onoman (6) maitia, bon uoman mai Temakin ao 4 mai Takoronga. Taben te tiim aio e na bon waaki man taan kooti ao n anga te reirei ni katoa wiiki nakoia taan kooti. Ana bon waki naba kain te tiim aio n reirei naba ma taan anga te kooti iaon Betio, ao e na bon karekeaki riki te tai reirei ke te workshop ma te Tama Koru ibukin karaoon tibangaia kaain te tiim aio.

#### **3. Kabutan Ana Tangira Te Uea inanon makoro**

E tia ni moanaki te mananga nakon

makoro ake a tuai n tei iai te botaki ni Charismatic iaon Betio. Inanon te tai aei ao e bon moanaki te waaki moa mai Takoronga, mani te makoro aika Santo Ioteba, Santo Mikaere, Santo Rabaere ao ai te Rooti ae Kamimi. Te kantaninga ba enaki raing maan ao ena manga karaaoaki naba aio i Temakin. Tia bon karabaia moa ara Mitinare man Santo Ioteba ae Katekiti Tabuia, Katekiti Roobati man Tirotaameeti, ao ai Katekiti Berenato are bon ngaia ara are e taraua te botaki ni Charismatic n ara Parish iaon Betio. Ti karabaraba nakon Te Uea ibukiara Katekiti aikai ba ngaia ake a bon kaira te waaki ao ni boutoka te waaki aio ni kawari makoro aikai.

Ti bubuti nakon Te Uea ba ena teimatoa ana karaoiroi iaoia ao mani kakorakoraia n tainako inanon aia makuri ni mitinare, riki aia boutoka nakon ana waaki nako te Charismatic iaon Betio. Ke e teimatoa ni mamakuri te Tamnei ae Raoiroi iaoia n tainako.

#### **4. Katokaan aran ara botaki ni charismatic n ara parish ae Betio**

Tia karaba Te Uea ibukin ana aomata ae tabu ke te Saint ae St Faustina ba ea tia n rineia ba ngaia te tia tararua ara botaki ae banin iaon Betio. Inanon te bong ae 29th August, 2010, ao e a karaoa ana botaki n nebonebo ao n amarake ni bukamaru kain te botaki ni Charismatic iaon Betio ni karaba ao neboa Te Uea ibukin aran ara botaki are enang kinaki ngkai iai ae St Faustina Charismatic, Betio Parish.

Ti bon karabajia naba ara irua n te tai aio mai Makin, kaain te Charismatic mai Makin ake a roko ni buotakaia aia taan takakaro ibukin te runga, ni ikotaki ma ara irua naba are te Tiibi Riita mai Bikenibeu Nei Beia Tiim ao ai Koati Teingoa te Kauoman n Tia Babaire n te NSC ao e tei naba ibukia kaain te Teaoraereke Parish, ao a raonaki ngkanne iroun ara Katekiti n te Charismatic are Bereñato ma buuna.

E raba Te Uea ni kanoan te tairiki anne, e bon moanaki ma te nebonebo inanon te Umantabu are Santo Bauro ao e a rimuiaki naba ma kanoan te maneaba. E kakukurei te botaki ba e a kinaki raoi St Faustina irouia ara irua ao riki irouia kaain ara Parish ae Betio, imwin te kabarabara are e kaoraoia te Kauoman Tiibi Riita mai Betio are Riwata Obeatai.

#### **5. Te kainaomata i Abaokoro, Tarawa Ieta**

E mananga ana tiim St Faustina nako Abaokoro n 20th August ni karaoa aia kainaomata kaain te kurubu ni Charismatic iaon Abaokoro. Moan te kakateke te kurubu aio ba e bon kateaki ao ni kainaki irouia ataei ae moa man te



***“Ti a karaba Te Uea ibukin ana aomata ae tabu ke te Saint ae St Faustina ba....”***





*"Aia kurubu ni  
charismatic ataein  
Abaokoro..... ao  
manga akawaia aia  
karo....."*

koraki teuana ke te koraki uoua n te primary school nakon te roro aika ikawai riki ba a reirei n te kauarinan. E bon moanaki man boutokaki te kurubu aio ioun tangaia Nei Tieretin ma Na Kiaua are bon taan reirei ngaia n te kaawa aio.

E nakon te tenigaun tabun maitia kaain te kurubu aio, ao e bon kainaki ngkanne irouia aia karo ataei aikai tabeman. Ti noora ana kamimi Te Uea irouia ataei aikai ba taan taetae ni ianena ao moan te korakora aron aia nebobebo, e babane nanoia n taai nako ngkana a nebobebo. A tabe ni maiti taanga ke ikawai n te botaki aio, ba ataei aikai a bon aki toki ni katoa aia tai n tataro ni bubuti nakon Te Uea ibukia aia karo ba ana kaaina naba aia botaki ni Charismatic.

N tain te kainaomata ao a bon bane ataei aikai ni kainaomataki ao a raonaki naba irouia aia karo tabeman ni kainaomataki ao ni kaaina naba te charismatic. Inanon te wiiki anne, imuini te Kainaomataki ao e a manga kateaki raoi ngkanne ana taibora te kurubu aio, are e a reke iai te Tia Babaire ma kain ana taibora. (Ti karauteka ba e aki tauraoi ariau kaain te Tai-bora aio imain tian te Emmanuera n te tai aei)

6. Ana Toa St Faustina 5th October, 2010

Tia manga reitaki riki te karabaraba nakon Te Uea ngke e tia n anganira ara Santa ba aran ara botaki iaon Betio ae banin, ao tiaki ti ngaia ba e a tia naba n anganira ara tataro nakon St Faustina are e rairaki man te taetae ni imatang nakon te taetae ni Kiribati. Tia karaba ara Tama Fr Koru ma tarira ao manera ae Uriam Timiti mai Suva ba ngaia ake a ibuobuoki iaon aio. Ti rangin karabaraba nakon te Uea iai ba tia reitaki riki iai ma ara Santa ae St Faustina mani kananoa riki iai ara onimaki ni kakoroan nanon ana babaire ma ana kantaninga Te Uea ibukira. (Noora iteraniba (page 16).

N te tai aio, ao tia manga kaitaua riki Te Uea ibukin ana Toa St Faustina are e kaur-ingaki 5th October n te ririki aio. Ti bon reitaki ma tarira ao manera ni kabane iaon Kiribati, Fiji ao New Zealand nebobebo n te tai aei ba bon ngaia naba temanna are ena tia n rineaki ioun Te Uea ba ena buoka kabutana Ana Tangira Te Uea n rinanon te botaki ni Charismatic ibukia kaain Kiribati ni kabane. E bon moanaki te kauriringan te toa aio ma te Tutia are e karoaki i Takoronga, Santo Bauro, e rimiaki ma te tataro nebobebo ao ai kanaon te maneaba ao te amarake ni katekeraoi.

E raba Te Uea n ana Tangira iaora n taai nako, ke e teimatoa ana tangira ma uran ain te onimaki ioura ni kabane ba taan makuri ngaira ioun Te Uea, ao e na neboaki n taai nako n uaan ara kekeiaki ni katoabong. Kam raba tariu ao maneua.

### **Ribootin te mananga nako Nonouti**

*Ioane Kauoman Tia Babaire n te NSC.*

I mwin kamatoakin raoi taekan te mananga nako Aonnaba n ana kariaia Fr Michael Mackenzie ae te chaplain n te charismatic n 09/01/10 ao ikai are e a baireaki ba Teaoreareke Charismatic Renewal ngaia are e na kawara Nonouti.

E barongaaki raoi kanoan te mananga ioun te NSC n reitaki ma Fr Koru Tito are bon ngaia are e na katauraoia taan mananga n te tai aei ao aio ngkanne kanoan te katauraoi:

1) Te Rereua man 22/01 – 24/01/10. Bon Fr. Koru Titoo ae e kaira te rereua ao e boboto kanoan te rereua aio ti iaon Ana Karea te Tamnei ae Raoiroi.

2) Te Workshop man 15/03 - 17/03/10.

Bon Fr. Koru Titoo ae e wakina te workshop aio ni kamataatai riki bai ake a na riai ni uoti taian tiim nakon abamakoro ake ana kawari n aiaron aikai:-

i) Ana Karea te Tamnei ae Raoiroi n reita nako riki are n te rereua.

ii) Te Karemo – ti riai ni kabatia te karemo n ara tai ni makuri ibukin te korakora.

iii) Spiritual Fasting (Karemo ke Taonannano n Tamnei are iaon riki te karemo ke te aki mamamatam) – Ti riai ni kabatia ni kaitaran makuri aika korakora

iv) Tina tauri rabatara iaon te Kaibangaki – Ti riai naba ni kabatia ba korakorara ni kanakoa te riaboro.

v) Kamaunaakin katei ni kawai ake a mena iaan maakan te roo n aron te akawa, te ununiki, te bain aoraki, te korokarewe, te kaneweaba, te takakaro, te maie, te kateitei ao ai ara katei n amarake ae te tabutabu – kam riai n taekin baikai nakoia kain aonnaba ao ni kamataatai nakoia ba baikanne ni bane bon ana makuri te riaboro ao a riai ni bane ni kaakaki ni kamaunaakoaki.

vi) Bairean raoi te Tiim – E riai ni baireaki raoi aron te tiim n te aro ba ena aki tiku iaon ti temanna kairan taian waaki ni kabana. E na katannakoaki temanna ma tibangana n aron aikai: N tain te borau e na mwiokoaki temanna ibukin kairan te tataro, ngkana kam roko n te aba ao e na mwiokoaki naba temanna ba e na tararua ti kairan te nebobebo, ao e na iai naba ae e na ti tararua kairan te katoki aoraki. Ibukin te anga reirei (ti iaon reirei akana a taekinaki ieta akanne) ana bane ni katannakoaki temanna ma temanna tibangai a n te aro ba aonga ni bane ni makuri kain te tiim.

E bobonga raoi aron te katauraoi ibukin kawaran aon-naba ioun Fr. Koru Titoo teuana te wiki (1 wk) imain Bakate, ao matoa raoi taekan te mananga uoua te



wiki (2 wks) imwin Bakate ngke e karaoaki te rereua ni kananako are e boo i Teaoraereke man 16/04/ - 18/04/10 are e a wakinna te NSC are e tuatua Fr. Michael ian tabetabena.

E kitana Tarawa te tiim n 27/04/10 iaon te Super Carrier. Maitia kain te tiim ake e rinea te Uea bon tengaun ma onoman (16). Ti roko i Nonouti n 30/04/10 ao ti waerake i Matang ao ti moanibaia te Eukari ni kawaria n neboneyba Iesu are E maeu ni koaua ao ni katituaraioa man karaba ibukin ana tangira nakoira n ana kakawakin inanon managara inanon marawa n te maan ae uabong ao riki n te tibanga are e a karokoira iai iaon Nonouti ba ti na taetaekina Ueana iai ao ti mwiokoia ni bai ni kabane iroun Tamneina ae Raoiroi.

Maitin kawan Nonouti ake ti kawaruii bon tebui ma uoua (12) ba: Matang, Taboiai, Temotu, Rakentaa, Autukia, Rotima, Temanoku, Teuabu, Abamakoro, Benuaroa, Tebuange ao Mataboou. E waaki ara makuri naba n te bong are imwina iaon te kaawa anne. Ara makuri are ti karaaoia ngkanne bon kawaran taian mwenga ni karaoa te kaitiaki, katoka bai iaoia aoraki, ao te neboneyba ni karokoa ana tangira te Uea iaan taian mwenga. N te tairiki ao bon ara tai n reirei n te maneaba iaon rongorongan te botaki ni charismatic.

Ti karaba te Uea n ana tangira ba e bon raonira ni manangara ao inanon te makuri ake ti karaoa i binkina. Inanon kawaran mwenga ao ti kaitibo ma ana makuri teuare buakaka aika bati ma e raraba te Uea ba E bon noori bai ni kabane ao E bon bane naba ni kanakoi. Irarikin anne ao a maiti naba ake a bon namakina ana tangira ni koaua te Uea are karki te rairannano irouia ni kaaki aroia ni kawai ao ni maeuna ae boou ae irarikin te Uea are ti a bon kimarerei iai ngaira kain te tiim ba e a tia ni kabonganaira te Uea ba rabatan ana Rongorongo ae Raoiroi ni koaua ao ni kaota te tokanikai ni karaooan te tibangara ae moan baan te raoiroi ao ni bongana iaoni baa ni kabane.

Te karabaraba naba nakoia kain te Aro i Nonouti ni moa mairoun te Tama Teatao, ana mitinare ao ai bon tarira ma manera ake a tia ni kaota te tangira ma te ibuobuoki nakoira inanon ara tai n tiku ibuakoia.

E ababaki te ribooti ao moan te kakaongora ngaiare ngkana ko tangira am copy iaon ribootin te mananga nako Nonouti ao e na kona n reke buokam man te NSC i Teaoraereke. E na bon karinaki naba nabatan te ribooti ae banin n ana website te charismatic are kccrs.org.ki.

Te Uea irouumi ni kabane ao E raba te Uea. Alleluia.



## Iesu n te Eukari


### ***Te kakiritimati n te Eukari***

*Nei Beneteta, stpadrepio, suva*

I uringa ana kabarabara Fr Dwyer i Tabwiroa... I tekateka imwain te Tutia uoua te wiki n nako ao I uringa te Tutia te taina n te reirei i Tabwiroa ma ana taeka te Tama Dwyer ae e kangai, EVERY EUCHARIST IS CHRISTMAS! ae tao nanona n ara taetae, NI KATOA TUTIA AO TI BON BUKAMARUA TE TOA ARE TE KAKIRITIMATI. Ai tikiraoira te rongorongo aei! E atongaki ngkekei ma I aki ongo nanona ai kamira!

I karaba te Uea ba aio kaotakiu irouna:

Inanon te Tu-tia ao ti bon rinanon kauringaan te miterio are e bukamaruaki n te Kiritimati, Rikin te Atua n Aomata, arona ni karikaki n aomata , bungiakina ao ana tai n ataei ma maeuna iaon te aba ao manga utina mani maeu n te mimitong i Karawa.



N tain te Onikaki:

N tain te onikaki ao e atonga ae e kaangai te Berebitero, "Rabatau aei" ao n te tai naba arei inanon baina are e taua te bane e a manga bungiaki Iesu inanon baina! Bain te Berebitero arei e a manga riki bwa nnen kanaia maan are e kaweneaki Iesu te tee iai! Aomata ake a ira te Tutia a riki ba kanga taan kawakin tiibu ake a roko n noora Iesu te tee iai! Anera ake a anene irarikina! E taua Iesu are e a manga tiba bungiaki, n aron are e bungiaki n te Kiritimati! I namakinna naba ba n ana taetae Iesu ae "Rabatau Aei" e aki ti atongnga nakon te bane arei. I taku ngai ba e atonga naba nakoira ngaira kaain te Tutia. E tuangira ae ngaira naba bon rabatana, rabatan te Ekaretia ae ngaiara ara mataniwi ao Tamara are i Karawa are bon Tamana naba. E kauriingiira naba ana bai n tangira are e anganiira n tain babittoara are ti riki iai ba natin Tamana. Ai tikiraoira ana rongorongo.

Ai kakabaaakira ara Berebitero n nakoia ae te taua rabatan Iesu inanon baina! Bon au tatato ao au bubuti ba e na reke ana tai temanna te Berebitero ke uomana n tibaa aron aia namakin n tain te Onikaki. E na bon ingainga nanora ni kan ongora iai.

E reitaanako ana taetae te Berebitero man kangai riki, "E kabureaki ibukimi". Ao e tabekaarakae Iesu are e tei iaan katotongan te bane nakoia aomata ba a na nooria n arona are e a tia ni maraki ao ni mate ao ni manga uti n te mimitong! E otabaniniaki n te raneanea, ba bon te Atua ngaia ae e mimitong! N otanakona iaon te maunga are Taabora ao bon moan te on n te raneanea, aio mimitongina are a nooria ana Abotoro.

Ao e a manga kangai, "Anaia ao



*"Ti karaba te Uea n ana tangira ba e bon raonira ni manangara ao inanon te makuri ..."*



*"Ko na kamainaki  
ngkana ko onimakina  
raoi te tataro aio"*

kanna" ao e anganii aomata ba kanan tamneia n te Komunio ba e na maeu Iesu inanoia ao ngaia inanon Iesu. Te botaki n amarake are ti amarake iai n te Kiritimati ti kukurei ni butimaea rokon Iesu te teei, Emmanuera, Iesu ibuakora, rokona iaon te aba ma maeuna ibuakora ba ti noria ae ti kona iai ni miiakina aron maeuna ma ana makuri. Ti kona ni miiakina naba aron ana tangira ao man keiaki ni kato-tongna ba ti aonga n maeu n ai arona n aron Santo Bauro are e maeu inanon kairana iroun te Tamnei ae Rairoi, tamnein Iesu, ni karokoa te tai are e a kona iai ni kangai, 'ngkai I maeu, tiaki ngai ae ma bon Iesu ae e maeu inanou'.

N tokin te Tutia ao e kangai te Berebitero, "Naako, inanon te raoi". E kanakoira ma te kantaninga ae ti na nako n tibatiba ana raoi Iesu aio nakoia raora. Imain nakou ao I noora Tinara Nei Maria ba bon raora inanon te Tutia ba ngke ti kauringa manga bungiakin Iesu iroun Nei Maria i Betereem ao ti bon riai naba ni kariaia ae e na manga bungiaki kaua Iesu n ara onimaki inanora ao inanon tamneira ao man kariaia ba ti na riki ngaira ba 'tinan Iesu'. Bon iai ngkao ana kaeka Iesu nakon ana titiraki are e kangai "antai tinau?" ba e kangai "tinau ao tariu bon naake a ongo ana taeka te Atua ao a karoa nanona" (Ruka8:21) ao manga rimwi riki mai iaon ana kaibangaki ao e kangai nakon Santo Ioane, "Aio tinam". Kam raba tariu ao maneu ao ke E kakabaiai ngkami Iesu n te Eukari n tain te Kiritimati n te Tutia. Amen.



#### **Ana Tangira Iesu ni katoki aoraki n rabatana ae Te Eukari**

Kamoaa Kamwaoto, St Faustina, Betio

Rabatan IESU n te Eukari ae Moan te Tabu

I a kan tibaa ana tangira IESU ni katoki aoraki n rabatana ae moan te tabu n te Eukari, nakoimi tariu ao maneu. I a rimoa ni anga au karabaraba nakon tarira ao manera ae Benateta Raobati ma natina ae man te Charismatic group ae St Padre Pio I Suva, Fiji n ana kaongora are kanoan te Emmanuera Volume 2, Issue 2, Tuesday, 29<sup>th</sup> June, 2010.

E tiku n au iango te rongorongo anne ngke I tia ni warekia ao n na kaongorai ngkami ngkanne baike e a tia ni kaota naba iai ana tangira Te Uea ni katoki aoraki nakoia au utu ao nakoia naba aika tiaki kain te katorika. (Aron karoakina ae inano.)


Te moan tai bon nakon kainabau ae Nei Tiera. Boni maon wiikin te namakaina ae September ao e a roko marakin makan wiina. E aki toki n te batin are e a tia n nima 3 te tablet. E a manga karoa ana bai n aoraki are e bon totoki iai marakin wiina mai imaina ae rangini kataoroaki te ran n te mangko. E aki buokia naba ngke e tia n rurua wiin iai ao te

maraki arei e bon rangi ni korakora n te aro are e waerakea atuna ao man ririaki n tatangitang i nanon ara auti ao nako tinanikun ara auti.

Bon raou kainabau aei ngke e moan tairiki n te tabo n nangkona ma e aki kona ni mooi ibukin marakin wiina are e boni kaongoai n ara tai ikekei ao ibukin ae akea ara batin n te tai arei ao I a butia Kautu are ara leader n te group ni Charismatic man te makoro ae Tirotaamteeti ao e a karekeea 6 te batin ni maraki.

Ngke I tabe n tekateka n nangkona n tataninga okin kainabau ao e a roko naba temanna natiu ni weteai bwa e a a rangi ni kainano Nei Tiera. Ngke I a roko n te auti ao e a butimaeai ma te rawawata man taku nakou, " Ko a boni karauko n nangkona ni kukurei ao ngai I a kani mate n te maraki. Akea am ibuobuoki nakou" Ngke e a bon tiba moti ana taeka ao I a kairia naba nakon tamnein Tinara Nei Maria are e mena naba iai te Emmanuera are Issue 2 are kanoana " Ana tangira IESU n te Eukari? Ngke ti tekateka ao I a titirakinna naba ni kangai, " Ko kakoaua ae maeu Iesu n te Eukari? E kaeka ni kangai, " I kakoaua". I a ana te Emmanuera ao n rairi baana nakon Tamein te Eukari. I tuanga ngkanne ba e na katurua tarakina ni kakoaua ba e bon maeu IESU iai ao ni butia ba E na tiba marakina ma ngaia ba e aonga ni kanakoa marakina. I nanon ana tai ni karoa anne ao I a wareka naba te tataro are n ta page are I mwina n teina raoi are n te Emmanuea. Ngke I a tia ni warekia tenua te tai ao I a reitia naba ma teuana te miterio n korona ba ara katituaroi. Ngke e a moti ba e a korakora riki tangina ma ranni matana aka bat. Ngaia are I a titirakinna ni kangai " E aera, e tuai toki marakim? E taku nakou" E a Kaman toki, ma I a bon tang ba e rangi ni korakora ana tangira te Uea ba e a bon toki naba n akea teutana ae I namakinna ngkai". E rabwa te Uea ba e tuai man oki marakina ni karokoa ngkai.

Te kauoua ngkanne, bon natiu ae ai tiba teniu ana ririki. Ni butin te aoraki ae te "flu" n wiki aika nako ao e ituaki naba natiu aei n te kabuehue ao e rawa n amarake. Ti aoooo n te batin ma i mwain koron aoan t batin ae aua ao e a kaman roko kabuebuena. E aki kona ni matu ma e a mwengaraoi riki ngkana ti uouotia ba e tang ngkana ti kawenea n ana tabo ni matu. E a bon roko irou te kua ibukin uouotakina n te tai ae maan ngaia are I a ikotia natiu ni kabane ma kain abau ba ti nang karoa ara korona i





## E MAIU IESU N TE EUKARI

- KATURUA RAOI TARAKIN TE EUKARI ANE N TE TAMNEI
- KAKOAWA RAOI BA E BON MAIU NI KOAWA IESU IAI
- BUTIIA BA KO NA TIBA MARAKIM MA NGAIA BA E AONGA NI KANAKOA MARAKIM



### WAREKA NGKANNE TE TATARO AIO:

"O LORD JESUS CHRIST IN THE BLESSED SACRAMENT OF THE EUCHARIST,  
YOU WHO HAVE GIVEN US YOUR PRECIOUS BODY AND BLOOD TO BE OUR MEAT  
AND DRINK, GRANT THAT I MAY BELIEVE IN YOUR REAL PRESENCE HERE WITH US  
AT THIS MOMENT SO THAT YOU CAN TOUCH AND HEAL ME STRAIGHT AWAY.  
NANOANGAIIESU BA I A KAWATAIAOKA, AMEN"

NOTE: KARAOIA MA TE BAU N NANOANGA KE TE KORONA

bukina.

Ngke e moti ara tataro are teuana te miterio ao I a ana naba te tataro are e kaineti ma IESU n te Eukari. Ai ti ngai ma kainabau ba natira ake a ikawai riki a tia n nako ngke e bara ara korona. Te kamimi ae ti noria n te tai arei, ba ngke e a bon tiba moti ara tataro ao natira are e aoraki e a kerikaaki kabuebuena, ao ngai are I tobaia, e a tuangai naba ba e na amarake ao kanana are e tangiria bon te kabeti raiti. Ngke e tia n amarake ni kanana are e tangiria ao e a tuangai ba e na matu. E teirake n nakon ana tabo ni matu ao e a boni mwengaraoi naba ni matu ni karokoa e ngaina. Ngke e uti ni matu n te ingabong anne ao e a takakaro ni biribiri ma raona n ataei ba ai bon te marurung raoi. E na neboaki te Uea.

Te kateniua n tai ni kaota ana tangira te Uea bon n au tabo ni makuri. Ngke I a uota te Emmanuera anne (issue 2) ni kaota tamnein te Eukari ma tatarona ao karaoana i aon teuana te iteraniba n au tabo ni makuri n te kombuita ao ngke e norai temanna raou ni makuri ae tiaki kain te katorika ao e titirakinai bwa tera are I karaoia . Ngke I tia ni kabwarabwara nakoina ao e a butiai naba ana copy teuana. Ngke e a tauraoi ma tuai bobonga raoi ao I a print out naba ana copy

teuana. E aki tabara ma e tekateka naba ma ni katoka te copy iaon ana taibora ao e a tataronna naba. Ngai ngkanne I a tannako ni katia raoi te tataro anne n te kombuita.

I mimi ngke e a karabaa naba ao e taku ba e boni keiaki ni mananga ni makuri ma te maraki n atu ao e a maan ni b'ab'atin ma e tuai man toki. E a tib'a toki raoi n te tai anne ao e a marurung raoi ni makuri. E tuai man oki marakina anne ni karokoa ngkai. I tuanga ba e na karaba te Uea ngkai E a tia ni kaota ana tangira nakoina n tataroakinan te "Korona ke te Bau n nanoanga" Man ana tangira IESU n te Eukari aio ao e maiti te aomata aika I a tia n tibaia nakoia ao a maiti naba aika a tia ni kaongoi ba a buokaki naba iai.

Au kantaninga ae batia tariu ao maneua ba e na tiba naba ana tangira te Uea nakoim i am i tai ni kainanoia ngkai ti boni kakaoaua raoi ba E a kamani kaota kororoain ana tangira ae akeea kabotauana nakoia ana aomata ake e karikia ngke e kaakeaa Mimitongina n riki n aomata ao ni kataua marakina ao matena ao n riki ba kamaeuara n Rabatana n te Eukari ae Moan te Tabu. Ko raba IESU n am tangira nakoira ngaira am aomata aika ko karikiia.

*"E kamainaki naba  
ae tiaki kain ara  
Ekaretia n onimakinan  
te tataro aio"*



## Te Karaki

### **Nana Taratara Iesu\_Reitakina ma Tinana Nei Maria**

Fulitua Bauro Taraora ian ana kariaia C. Alan Ames, St Theresa n Iesu Te Tei, NZ.

Ngke I rinnako ni mataroan Mwengau, ao I noora Tinau are e tabe ni kuka. E kuba n tanrikaki ao e bon mimi ngke e norai. "Iesu!" E wingare ngke I tabe ni kawaria ao I rabatia. "Tinau I rangi ni kukurei n manga noriko. I a tia n rangi ururingko n namakinan akeam irarikiu." I tuanga Tinau, ma te kukurei ngkai I a manga roko ni Mwengau.

E katoka Atuna Tinau iaon babau ao e taku, "I a tia n ran gi n ururingko ao n namakina naba akeam irarikiu natiu, I rangi ni kukurei ngkai ko roko ni kawarai. Ko bon bae n rangi ni baki. Tekateka ba N na karekea teutana te amarake ibukim." E aroka tabau ao e taku riki, "N na katauraoa te amarake ibukia naba am reirei aikai."

"Tinau, I rangi ni kukurei ngkana I oki nako rarikim. I aki toki n namakina am Tangira ae kaonrakea nanou ngkana I mena irarikim. N tai tabetai ngkana I raroanako n te tairiki ao I uringa aron babakoakiu iroum ngke I uarereke, ao aron Am tangira nakoiu are e baro mai nanom." I tuanga Tinau ao I ururingtaai ake ngkao.

"Ngai naba Natiu, bai ni kakawaki inanou tai aikanne, ngke ti uaia n maeka ma Ioteba, ba te utu inanon Ana Tangira te Atua." E kaeka Tinau.

E nako au iango nakon Ioteba, "Eng, Ioteba, Au tia katanai ae e rangi n tatangiraki, Au tia kawaknai, Au tia Reirei inanon Ateaiu. Ioteba, are e rangi n nimamannei ao n nanorinano, are e rangi n onrake n te Tangira, te Maane ibuakoia maane, te baintangira nakon te aonnaba, te baintangira are e kakaraoa ana makuri ma te aki kakarongoa ao te Tangira."

"Weteia raraom karinii." E taetae Tinau. E bon baka rannimatana teuana, ba e tabe n iangoa Ioteba. E tabeka baina n kaoaanako rannimatana ao e taku, "I rangi n tangira Ioteba ao I bon aki toki n ururingga, ma I atai a ba e a rangi n kukurei ngkai ao ti na bon manga botaki n ti teuana ma Tamara are i Karawa."

I otinako ao I tuangiia raou, "Ae e tabe ni katauraoa kanara Tinau. Ti a nako nakon te tinakoka teutana te tai n anga ara tataro ni kakatituaraoi ibukin ana Tangira Tinau."

E otinako Tinau ao e taku, "Ma Iesu, Ko a baki. Amarake teutana ngkai ni karekea angin nanom ni karokoa ko oki.."

I tanrikaki ao I rabatia ma n taku ma



te kukurei, "Tinau, ko aki toki n raraoma ibukiu. I aki maan n nako ao ngkana I oki ao I a amarake ni kakukureiko."

I aroka tabana ao tia mananga nakon te tinakoka are e aki rangi n raroa. E takarua Tinau ao e taku, "Tai rangi ni maan Natiu. E maiti te bai ae ti na maroroakinna."

Ngke e bane ara tataro ao ti a okira Mwengau are e a tia ni katauraoa iai te amarake Tinau ae e rangi n tamara. "Rinnako, rinnako." E tuangia raou ngke a tei imatan te mataroa. Kakaea nnemi n tekateka ao kamwengaraoi ngkami. Kam ataia ba I rangi n tangira rokomi ni kawarai. Ngkami nakoiu, boni ngkami natiu ni kabane."

E kaeka Betero, "Ao ngaira ti bane n araniko ba Tinara ngkoe." A bane n reitia nake nikiria ni kokoaua ana taeka Betero. E wingare Tinau ao e taku, Eng e bon rangi ni bubura ami utu aio ma I ataia ba e rangi ni mawa ana nomi ibukia aika a rangi ni maiti man maiti riki."

E rangi ni kangang kanara, n aron arona are I ururingngā n tai akekei. N tain te amarake ao au reirei a karakinii kanoan manangara nakon Tinau man te tai are ti moan kitanna iai.

E ongorongora ma te kakauongo raoi nakoia ni kabane ao e rangi n kukurei n ongo aia taeka teuana ma teuana, ake a taekin, ao ngaiia ni kabane, a rangin mwengaraoi n ataa aroia inanon ana Tangira Tinau.

I wingare ba I iangoa aron Tinau n tangiriia aomata ni kabaneia inanon taai ma rooro aika a na roko, arona n kakauongo nakon temanna ma temanna, n aiaron te Tina ae e kakauongo nakon natina, ao arona naba n tauroi n roko n irarikiia aomata ni kabaneia.

I nora naba aron ana Tangira ae e rangi n itiaki, are e na kaonrakeia ma te ki-mareirei, aomata ake a mena irarikina. Ai te baintangira tera ae e rangi ni kakawaki are e a tia Tamau n anga nakon te aonnaba inanon Tinau, te baintangira ibukia aomata ni kabaneia, te baintangira ae a riai ni kabane aomata ni kinaa, te baintanginga are a riai aomata ni kabane ni kakatituaraoa te Atua ibukina.

E waekoa roon te bong inanon ki-mareireira n te tairiki arei ao e aki maan ao a bane ni matu. Tinau Nei Maria E katoaia temanna imuin temanna n rabunia mani kamen-garaoia ba ana aki mariri inanon te bong. Ngke E tia ao E a kawarai ma matana iaoia au abotoro.

"Iesu ae Natiu, ngkana I tarai mataia maane aikai ao I noriia ataeinimane aika a uarereke aika a kainnanoa tangirakiia. Bon titebo naba ma ngkana I tarai mataia tabeman inanon te maakete, iaon te kawai; a bane n taraaki n aiaroia ataei. Tabeman a aki ataa te bai ae a na karaoia, tabeman a taraa ni bua, ma ni kabane ngaiia, a bane ni kakaea te TANGIRA, ao I ti tangiria n angania te Tangira anne ba aonga n kunea te kawai nakon te maiu ao te kawai nakon te Atua.

"Natiu, I karaba Tamara are i Karawa, ibukin anganiku ana baintangira, are e karikai

*"Tiem e a riki ngkai ba temanna naba kain te Ekaretia ni Katorika iaon Betio"*

ba N na tangiriia aomata ni kabane ba oin natiu.."

I kararaa Atuu iaon waena ao e a riringa irannatu. " I taku ba bon te botanomata ae e riai ni kakatituaraoi nakon te Atua ibukin ana baintangira are a tia n anganaki rinanom. Tinau," I kaeka, ao I a matunako naba.

Ngke I uti ngke e a ingabong ao I nora Tinau ba e katorobubua n te koona n tataro nakon te Tama. Ana taeka ni kabane ake E taekin, a kaona nanou n te kimareirei. Ni kabane ana tataro a ringa nanou n te aro ae e rangi n okoro ao e reitaki nanou ma Te Tama ao te Tamnei ae e Raoiroi. I tekateka ni kainababu ni kariaia ana tataro Tinau ba e na kaonrakeai.

Imwin tabeua te tai ao e a toki ana tataro ao e a wareki beba ake a koreaki taian Taramo iaoia. I nako rarikina ao I tekateka irarikina, ao I raonna n wareki taekan te Taramo. E wingare ao e taraai Tinau ma te Tangira are e kiakianako mairouna. I wirikiriki nakoina, "I rangi n tatangiri tai aikai ngkana ko tataro nakon te Tama. Banaan ao am taeka bon ngaiia 'te tamaro'.

E bon mama n au taeka ma e rabatai ao ti reitanako warekakin te Taramo. Banaara a kautia au reirei ao temanna imuui temanna a raonira n ara tataro. E a onrake nanon te auti ni banaara n neboneyboa te Atua ao I ataia ba aio aron te bai ae e na riki nakon tai aika a na roko.....Tinau e na kairiia... ni kakananoa aia tataro nakon te maiu n tataro.

Ena manga reitaki.....!

## Ana Tangira Te Uea

### Ana Tangira n tina Nei Maria nakon Tiem

Aio ana reta Tiem Teuatabo nakon tinara ae Nei Maria (Tinan Iesu) imuui noran Nei Maria irouna inanon te mii. Tiem Tuatabo bon te ataeinimane ae ikawai inanon te utu ni Kamatu. E bon maeka i Takoronga irarikin te clinic inanon maken te makoro ae St Mikaere. Inanon namakaina aika a nako ao Tiem bon te tia e babai ni ngaireia taan kaitiki ma Nei Maria ake mananga inanon te kawai man te umantabu ae Santo Bauro i Takoronga. N te tairiki teuana ao ea mii Tiem inanon matuna ba e a mia Nei Maria n roko irouna. Aio ana reta ni babaeti nakon Nei Maria are e a wae-ko naba ni koreia n te ngaina anne ao ni kakaea angan rokona n te Umantabu ae Santo Bauro ba e na nikiria iroun Nei Maria.

Tiem e a riki ngkai ba temanna naba kain te Charismatic iaon Betio. E batu Ana Tangira Te Uea nakoina ba e kaekaki ana



tataro nakon Nei Maria ba e kan waekoa ni kaina te Katorika. E a tia ni babetitoaki ao ni moani komunio naba iroun Te Tama Koru inanon te namakaina ae Tebetemba. Tiem e bakara ana ka-5 wiiki ni kooti (Maeu ae Onraken teMaeu). E na riki Tiem ba temanna naba te tia kainaomataki iroun te Tamnei ae Raoiroi n ana Tutia n Reitaki te Charismatic are ena karaoaki te namakaina aio ae Okitoba.

"Aio ana reta Tiem ae koreia nakon Tinara Nei Maria"

04th August, 2010

Betio Takoronga

Nakon Nei Maria tinan Iesu ao tinaia kaain Aonnaba. Maur!!!

Kona mauri Maria ae ko on te karatia, E mena Te Uea iroum, ko Karaoiroaki ibuakoia aine, ao e Karaoiroaki uaan birotom ae Iesu.

I neboneybo ao man katituaraoiko ibukin am tangira ae moa te bati are ko aki toki n anga n tainako ba am baintangira nakoia kaain aonnaba ni kabane.

Ko raba ao ti katituaraoiko tinara Maria ibukin am tangira ae teimatoa ibukira.

Au namakin ibukin aron maiu n aomata e aki botau ma natim ae Iesu Kristo, angia aomata ni kabane a bane ni maiukina te maiu ni kekekiaki. Ai arou naba ae I aki toki ni mena n te maiu ni kaibabaru.

A bubuti nakoim tinau kabaran au bure mairoun natim ae Iesu, ngkai bon te aomata ngai ae te tia maiukina te bure n taainako. Ngke I riki ngai ba temanna kain aonteaba, ao mai ikanne are I a riki ba te tia bure.

Anganai te Tamnei ae Raoiroi ibukin buokau n tai nako, ao kakorakorai n anganai te kakaonimaki n tataro ibukin ana kariri teuare moan te buakaka, te tia bure ngai ao I aki tau i matan Natim.

Au moan tai aio ni karaoa te bubuti inanon te reta, ba ibukina ba e rio te bai aei man am makuri ni kaotioti are ko kaotiko inanon te mii, ba bon ngkoe te tina ae ko onrake n te karatia ibuakoia aine ni kabane.

I karabako ao I kakaitauko ibukin kaeakan au bubuti inanon ririki aika bakanako. I a tia ni mena n Ekaretia aika a kakaokoro, ao man bubuti ibukin kan ataan te Ekaretia ni koaua.

Ao ngke ko roko irou, ao I maaku ao man takarua n uti, ba I ataia ba te tia bure ngai.

Ao man te bong ae te Katenibong 4th August 2010 ao I a riki ngai ba kaain am Ekaretia ma N na kataia ni kakaea ae e na buokai ibukin arou n rin inanon Umantabum ae tabu ma e na aki rangi ni maan aron kakaea buokai mai irouia aomata aika kain am Ekaretia.



"Au bubuti nakoim tinau kabaran au bure mai iroun natim ae Iesu..."



*"Man te tai anne ao I a  
bon kakaea naba te  
botaki ae te  
charismatic"*

*Aikai au berita nakoim tinau are e na riki  
ba kairan kawaiu n te bon teuana ma teuana.*

*Raraomau ni kabane ao au bubuti ni kabane,  
taiaoka mannanoi ni karokoi nakon natim.*

*Anganiia kain karawa ni kabane au kamauri  
ao man anganai riki te kekeiaki maaka n aki karaoi  
baai aika buakaka.*

*Ao I a kaniiko n aran Natim ae Iesu  
Kristo are ngaia ara Uea ao ara Tia Kamaiu.  
N aran te Tama, te Nati ao te Tamnei ae Raoiroi,  
Amen.*

### **Kain ara botaki ae St Padre Pio ae Bou**

*Uriam Timiti, St Padre Pio i Suva*

Inanon te bong ae te Kaabong 23 Tebetemba, 2010 ao e rina n roko te rongorongo irou maioun Riwata mai Tarawa ba ngaia taekan temnna kain ara botaki ae St Padre Pio. E bon roko te rongorongo aio n te email n aron e oti inano.

*maioun Riwata....* "Imain ngkoananoa ao I mii ba ti nebonebo i Tarawa ikai. I aikoa rangi n uringnga raoi ba iia te tabo ao ti mena iai n te tai anne. Ti tabe ni botaki n anene, ao ni kamronron n tekateka, tabeman ara koraki, ao I a tii kuba naba ngke e a kaoti naba mai bukiu temanna te aomata ae kanga e bainna n te kamarai mainaina ao e beenna ni Fiji (bee ni biti). E a tabe ni waki rake ao n tuangngai ba inanon ara tai n anene arei, ao te kuna are ti anaia arei bon kunana ae e baebaeta iai nanona ae kakawa man rawawata ngkai e a bon aki kona riki te bai teuana ma ai bon ti baetan nanona ae e a kababanea inanon te kuna arei are ti tabe n anaia ma kain ara botaki n tataro ni charismatic.

Inanon au tai arei ao I a bon kina raoi ba bon Tekabeii Kaoma are e a taetae nakoii arei ma ranin matana ao rawawatana ae batia I a nori irouna n te tai arei. N au kakauongo n te tai arei nakon banana ao e taekinna ba 'Te kuna are kam anaia arei, bon kunau ae I aki toki iai n rereitai iai ma kain St. Padre Pio i Fiji ba bon raraou n nenebonebo, Ni kunau aio, ao I a bon kaota iai nanou ae batia ma te rawawata ao te tang ae batia, ba a bon akea te bai ae I kona, ma ai bon ti nanou ni kan baebaeti iai, rinanon te kuna aio. Te kuna anne are bon kunau i Fiji n St. Padre Pio'. Aikai ana taeka Tekabeii aika I ongo raoi i tangau ni miuu arei, ao I a karekea taina n tibaia nakoim, ba tao bon iai nanona ae ababaki ke ae nano ae tao ko kona n iboubouoki n tataroakinna raoi, tao imwain tibakina nakoia tarira ao manera."

N reken te email irou ao imuun tataroakinana ao I manga kaeka ana email Riwata n aron ae oti inano.

*au kaeka nakon Riwata....* "Ko rangi ni batia n raba Riwata n am tibatiba ae moan te kamimi mani katekenano. N tataroakinana irou ao I taku ba bon iai kainanon Tekabeii are e kani buokaki iai n araa tataro.

Bon iai au reitaki ma Tekabeii man moan 2008 ngke I kawaria i Antebuka ibukin taekan ara saloon car are karoaki n te Lagoon

Motors. I bon mimi ngke I rin n ana aobiti ao I a nora te kaibaingaki ae toka iaon ana kombiuta (computer). Ngke I tanga ae rangi n tikiraoi nanon ana aobiti ao ngaia e taku ba te kaibangaki are I noria kanga kaotan ae e a bon tiba "raira nanona" ao e kakoaua ae bon ana kaibangaki Iesu ae e tia n anganna te korakora inanon ana makuri. I bon manga titirakinna ba tera ae nanonna n ana taeka ae "e a tiba raira nanona" ao ngaia e taku ba e ngae ngke e maan inanon ana makuri ni mitinare ao e kakoaua ae e aki batia ni kakarimoa te Uea ba e bon onimakinna i bon irouna. E a karakinna naba ba bon iai ana kanganga teuana n taai aika nako are e tia n roko iai iangoan ae nang kitana nakoana ni mitinare. Ma e tekeraoi ba e a reke naba manangana teuana nako Aotiteria. N tikuna ikekei i Sydney n te outero ae tao kan reke abui tabun borauataona ao ngaia e tiku n te ka-ubabu tabun ni borauatao ao e a bon namakina korakoran ana kanganga arei ao e ataia ba ai bon ana makuri te riaboro ni buakanna. Inanon ana buaka ao akea ba e noora temanna te aomata ni karebwebwe i tinanikun te winto. E ataia ni koaua ba bon te riaboro are tei i tinaniku ba akea ae kona n tei ikekei ngkai e bon mena ana ruu n te tabo ae moan te rietata. Inanon ana tataro n takarua ni wetea Iesu ba E na kamaeua ao akea ba e a namakina te ang teuana ae taonna are e a bon ataia ba ai bon Iesu ae E a kawaria. E namakina te rau ao te kukurei ao e ataia ae E a tia ni kamaeua te Uea riki man ana kanganga are e a tia ni mena inanona n te tai ae maan. Man te tai aio ao e a motikia i nanona ba e nang kabanea maeuna ni kakororaoa ana beku ni mitinare ibukin Iesu ao ai aio ngkanne nanon are e tuangai ba e tiba "raira nanona".

Ni motirawau n te Kiritimati ae nako i Kiribati ao e kamimi ba n te taina ao e a roko naba te bana n nano ae korakora teuana irou ba N na riai ni kawaria aomata aika uoman imain te oki nako Biti. Naakai bon Ereman Taoaba ao ai Tekabeii Kaoma. I ataia ba nakai a bon taonaki n te aoraki. I a tuangia kain au auti ba N na nako moa Betio. I roko iroun Ereman ao I maan ni maroro ma ngaia ba tao e kan reke uoua tabun te aoa. N okiu nako Bikenibeu ao I uringa are Nna moana Tekabeii i Antebuka, ma ibukin ae kanga e nang moana ni bong ao e aki reke tiku ma I a okira naba Bikenibeu.

N rokou i Bikenibeu ao e titirakinani tinau are ai manen Tekabeii ba e reke moanakin Tekabeii ao I karautakea ba e aki. I bon tiku ma te tabelianga ao e bon aki te roko n te reke kawaran Tekabeii ni karokoa ae ti a oki nako Biti. Ngke I a ongo ni moan te ririki aio ae e a tia ni motirawa Tekabeii ao e bon taonai te rawawata ngke e aki te roko n reke kawarana. E ngae n anne ao I bon aki toki n ururinga Tekabeii n au tataro ni butia te Uea ba



E na nanoangaia mani waekoa ni karokoa irarikina i Karawa.

Riwata e roko irou manga uringan Tekabei n am tibatiba ao kanga iai te kukurei iou ngkai e kona ni manga reke reitakina ma ngaira Tekabei inanon te kuna are "E roko Iesu". I ataia ba Tekabei bon te aomata ae a tia ni babaia te tangira ma te ibuobuoki inanon maeuna ao e raba te Uea ngkai E a tia ni manga anganira temanna kain ara botaki ae St Padre Pio ba teuiae Tekabei."

Tariu ma maneu tera am iango n aron te rongorongo aio? I karaba te Uea ngkai E a kaotia ikai aron kakawakin te tataro ibukia tarira ma manera ake a tia n rimoara. Ae kakawaki naba ba ngaia n ara bobotaki n neboa te Uea ti bon reitaki tiaki ti ma tarira ao manera ao anera i Karawa ma bon tamneia naba tarira ma manera ake a tia ni mate. Ti karaba Tekabei ngkai e a bon tia ni kaotia ba ngaia boni ngaia temanna kain ara botaki ae St Padre Pio ao ti na teimatoa n uringa n taai nako n ara tai n nebobebo ao riki inanon kunara are "E roko Iesu" ni butia te Uea ba E na waekoa ni karokoa irarikina i Karawa.



### **E Kamaeuai Te Uea**

*Nei Raawa Raakau, Onotoa.*

Mauri n Ana Tangira Te Uea,

Arau bon Nei Raawa Raakau ao bon kaain Onotoa. 42 au ririki ni maeu ao bon te KPC ngai. Ngke 19 au ririki ao I bon ira buu ae Turere nako Tuvalu. Ngke I roko i Tuvalu ao e kabakaaki arau nakon Meriteiti. N te ririki naba anne 1987 ao e reke naba irou te aoraki ae te kaatikitiki. Inanon te ririki 1992 ao I a oki nako Tarawa ba I iangoa kakaeani buokau. I boni bain aorakiaki n te riaboro ma e a aki reke tokina. N te ririki 2002 ao I a oki nako abau ae Onotoa ba ngkana arona ba I rina ni kabuanibai man aoraku aei ao e raoiroi riki ae I taunaki i Onotoa.I

I a bon tiku n tataroakina aoraku ba e nang reke ia buokau. I nanon te ririki 2010 ao I ongo ba a kakatoki aoraki kain te charismatic man te kaawa ae Temao. E a bon tuangai banaan nanou ba Nna bubutia Nei Boua Atanraoi ae te kaouman n Tiibi Riita ba e na bubutia kaain ana charismatic ba a na katokabai ni katoki aoraki irou. I bon rangi ni karabarabaa te Uea ngkai a kariaia kain te charismatic. N au onimaki ao e a kaeka au bubuti te Atua.

N 16 Aokati, 2010 ao e a taungai Nei Boua ba e nang katokabai teaba iaou. I bon nako ni kaea te katokabai ao man te tai anne are I a nora naba iai Ana Tangira Te Uea nakoia. E boni katokabai teaba n te Umantabu are i Temao. I a bon namakina ae rangi ni korakora te bitaki irou. E bon roroko irou te aoraki arei ma ai tiaki arona mai imaina. I karaba te Uea ba a tia tabeu tabeua inanon mengau, ao mai maina bon akea te makuri ae e kona n tia ba ai te riringaki naba ngai iroun kainabau.

Man te tai anne ao I a bon kakaea naba te botaki ae te charismatic. N te bong ae 16 Tebetemba 2010 n te aoa 8 n te ingabong are a nang kainaomataki iai kaain te charismatic mai Temao, ioun te Tama Kaitabo, ao e a manga roko naba aoraku. E bon tia te Tutia ni kainaomata ao te kauoman Tia Babaire n te NSC ae Kaoti are e roko mai Tarawa ibukin te kainaomata e a kaira naba te katoki aoraki iaou. Te bong naba anne are e a reke iai kama-toan au onimaki ngke I a kamaeuaki.

I bon anga au tibatiba imwin te tai are I kamaeuaki iai. I karaba Te Uea n ana tangira ma ana akoi nakoii ngkai E a tia ni kamaeuai. I kukurei n tibaia nakoimai tariu ma maneu ba I anga ngai ba ana tia kabuta ana rongorongo Iesu inanon te Charismatic. I a ataia raoi ba te oi n aro te Katorika.

Kam raba ao E Raba riki te Uea.

### **E aki toma Irou te kamaninga are I mia....ma E kaotia Nei Maria Nakoiu.**

*Katarake Tabera, St Faustina, Betio Parish*

*Mauri n Ana Tangira Te Uea,*

Arau Katarake Tabera ao Tinau Teangawa ao au ririki ni maiu 24 ao aran kainabau bon Nei Tearimawa ao temanna natira te aine ao kain ngai Arorae, Tamana ao Maiana.

Rongongou n te 1999 nakon 2004 ao bon te Mormon ngai ao imarenan ririki akanne inanon 2002 ke 2003 ao n te tairiki teuana ao I mii inanon matu ba I anganaki teuana te bai n tatakarao ae aknga te bai ni katomatoma (te puzzle) ba Nna katomatoma, ao I a kubanako ba e aki te roko n toma te bai are I anganaki, ngaia are I a angan tariu ae kari-muin karimuiu ba e na katoma. Ngke e a katoma tariu arei ao I rangi ni mimi ngke e a anganai ao e a toma ao ai tamnein Nei Maria ae toba natina Iesu Kristo ao I a bon uti naba. Ngai are e a ingabong ao I a karakinha nakoia kain au auti aron miiu are I aki at a nanona.

Ngaia tao bon nanona ae I a Katorika n te ririki aei,ao nang bon tiku n ana aro tinau ae Nei Maria ao Nna teimatoa n au onimaki ni karokoa ae I a manga kaina te botaki ae te kareitimaki. Ngai bon kaain naba te kainaomataki n te Tabati ae nako 26th Tebetemba 2010. Ko raba tinau Nei Maria ma Natim ae Iesu Kristo.



*“..ana tangira Te Uea  
ni katoki aoraki  
nakoia au utu ao  
nakoia naba aika tiaki  
kain te katorika..”*



## Te Reirei

### **Te tataro n neboneyebo ae te "Ribano" (e anaaki man Irian te Maiu)**

Iai te aeka n tataro teuana ao e babinaki n te Charismatic Renewal ae e aranaki ba te "Word of prayer" ao are ti na aranna ba te "Ribano". Arona na a bane kain te botaki n neboea te Uea n ti teuana te tai ni kanenei banaia, E kamimi n te moan tai, ao teuana I muin teuana, e rikirake ni bebete ma n titikiraoi.



A angakarea ngkao berebitero n te temboro ae i Ierutarem n te ingabong, ao n te tairiki koraki. Aia karea bon tibu ataei ao nab ate ribano ae e kabuekaki i aon te baonikarea. E angakarea naba te Ekaretia n ua tokin aonaba, ma ana karea boni Iesu (Te Eukari) ao te tataro: "Ti na aki toki n anga te karea ae karaoiroan te Atua ae uani matanriara ba kamoamoan Arana" (Ebera 13:15). E riki ba te angakarea ara tataro n neboneyebo n ai aron te ribano ae e tara ni mangaongao ma are e boiarara i matan te Uea.

"E na kamenaki au tataro i matam ba kanga te karea ae boiarara ao arorani baiu ba kanga te karea n te tairiki" (Taramo 14:2) Ngkana e kanganga n te moan tai te tataro ae te ribano ao uringa ba tiaki te bai ae bebete e angakarea. Ao n te tataro ti bon anga ngaira nakon te Uea.

Kawain te tataro ae te ribano

Ti na kamatui matara moa. Moan te bongana ba ti na aki matakau ke n itaramata. Ti kan nora te Uea i buakora man taetae na koina n ti Ngaia n aki tabeaianga irouia raora. E bebete riki te tataro ae bon waerake mai nanora ni koaua ngkana ti kaini matara ma ni katurua taran Iesu.

Ti atong taeka aika a uarereke ni karinea iai te Uea ao ti okioki n atoatanga "Ko raba te Uea. Alleluia....Ko raba Iesu....I tangiriko te Uea....Ti ngkoe ae Ko....am bai te .... "Te Uea, Ko maeka I buakoni karaoiroam irouia Iteraera " (Taramo 2:3).

Raoiroin te tataro ae te ribano ba a bane ni kona neboea te Atua kain te botaki. Ngkana e tataro temanna i muin temanna i nanon te botaki ae a maiti kaina ao tao ti iraman aika a kona n tataro i bukina ba angia tao a mama ke a maku, ke akea aia iango.

Raoiroina riki teuana ba ti rikirake n inaomata iai n angan te Atua neboana n aki tabeaianga irouia aomata. Ngkana e "rin" i nanon te tataro i muin ae e a tia ni motika nanona ba e kan tataro n aki matakau, ao e na rikirake irouna tangiran te tataro ae te ribano.

*"Te tataro te ribano e  
mangaongao tarana ma  
e boiarara i matan te  
Atua ....."*



### **Tataro nakon St Faustina**

S a n t a Faustina, I a kinako ba raraou ngkoe. I butiko ba ko na buokai ni karo-koau bubuti ao au tataro nakon te Uea.

N taai ake I nanokokoraki iai n aki onimaki, ao kairoroa ana Nanoanga te Uea n aron are ko aki toki ni bubutia ngke ko mena i aon-teaba, ba Nha uringa n taai nako bukin weteau Irouna n ana Nanoanga.



N au tai ni maaku, ao bubuti St Faustina, ana Nanoanga Te Uea ba Nha teimatoa n onimaki, ao ni manga onimaki riki ma te kakatonga, ngkana I ata Nanon te Uea ae E katauraaoai i bukin te mui-oko ae rangi tamaroa.

Tataro i bukiu, St Faustina, ba Nha aki kona ni maninga ae E a tia n tomaai te Uea ma Ngaia n ana Nanoanga ae ae akea tiana; Ao e na teimatoa ana kakaonimaki ma ana kamarurung nai-koiu ba a na kamawaaki bai ni kabane ake a na kauntaba ma Nanona. I muikoa maiu i nanon Baino.

Ko raba, St Faustina, ae raraou ae mamate nanou irouum. Tataro ma ngai n te tataro are E a tia n reireiniko te Uea ba ko na kabutia i aonnaba ae "Iesu I Onimakinako!". Kauringira ngaira tani borau n te maiu aei ba ngkana a nene ara onimaki, ao e na akea tian ana Akoi ma ana Tangira Iesu nakoira ni kabane. Amen.

## Te Maiu ae Tabu


### **Buokaia ara Berebitero—Maroro n aia Babaro kain te MSC Union i Suva**

*Uriam Timiti, St Padre Pio, Suva*

Inanon aia babaro kain te MSC i Suva inanon te namakaina ae Tebetemba ao aikai ara maroro ngaira kain te charismatic man St Padre Pio ake a tabekaki ba itera n ibuobuuki nakoia ara berebitero.

*1. Kam na teimatoa ni uuota ao ni kaota Iesu nakoia aomata*

Te kona n uuota Iesu nakoia aomata nako e bon kainnanaoa teimatoan raoiroin te reitaki ma te riki n ti teuana n ami tangira ae nano ma Iesu. Te reitaki inanon te tangira ma te Uea e kainnanaoa teimatoan te maiu n tataro ao te tangira ae nano ibukin te Eukari. Te katiteuanaaki n taai nako ma Iesu e na bon



angani ngkami te kona ni kaota raoi bannan Iesu n nanorinano, n nimamannei, ao n nanoanga nakoia aomata nako. E na bon kairia naba aomata nakon koburaken ana nanoanga ma ana kamaeu te Uea are raanga man Atiniban Iesu ae Moan te Tabu.

Aan karaoaan tabemi ni mitinare inanon nakoami ni Berebitero e na riai ni boto iaon reitakimi ma Iesu n taai nako. Te reitaki ma te Uea aio boni ngaia ae e na katerea mani kakoaua raoi ba baai aika kam karoai bon titebo ma Nanon te Uea. Kam na riki naba iai ba katotongan bannan ni koaua Iesu i aonteabu.

#### *2. Kam na riki ba taan kawakin tibu ni koaua aika a raoiroi*

Katei titiraki aikai ba buokan te iango. Kam tararuua raoi ami tibu ke kam bon tararuai ke tabeakini ngkami i bon iroumi? Kam tara nakoami ni berebitero ba kanga kawain reken kakannatomi ke kaekaan weteami nakon te nakoa ae mangori n toro ibukin Iesu. Te tia kawakin tibu ni koaua bon are e rin man te mataroa ao te mataroa aio bon Iesu ma ana kaibangaki. Ngkana ti aki rin man te mataroa ba ti tamarake man te oo ao ti riki ba kanga ai aoria ake a kan karekea te nakoa ibukin karekean kabaia ao tiaki ibukin kawakinia

tibu n aron nanon Iesu are boni ngaia te Tia Kawakin Tibu ni koaua. Kam na riai n tauraoi n taai nako ibukin buokaia ami tibu ni kainnanoia nako. Kawakinia am tibu man taian kabuanibai, riki mani bure aika a rangi ni kamamate ao kairia nakon te raira n nano ba aonga ni kamaiuaki tamneia.

#### *3. Kawakina kakannaton Nakoami ni Berebitero*

Kawakina kakannaton te nakoa ae tabu are kam a tia n anganaki n taai nako ao n taabo nako. Inanon ami makuri, ao n tabo ake kam kakamaewe iai, n ami katei ma anuami ao aromi n taetae, e na otu n taai nako ba bon Berebitero ngkami. Aron tabumi iaon te baonikarea n te tutia, E na riai n toka naba i aomi ngkana kam makuri ma aomata. N te tabo are kam mena iai e na riai ni kaekeia te tangira ma te karinerine irovia aomata. Aron tarami n ami kunikai ma teimi e na riai n riki ba kanga te m'aaka ni kaota te Atua ae E Maiu nakoia aomata ao kaotan ami karinerine nakon nakoami ni berebitero. E na boni bua karinean, kakannaton ao tabun nakoami ngkana kam aki kawakinna i bon iroumi.

#### *4. Maiuakina te aki kaubai, te nanorinano ao te ongotaeka*

Tauraoi n rinnako inanon te maiu ni kainano n aiaron te mena n te rereua ba ti ngaia te anga ae kam kona iai ni kainaomataki man katabetaben te maiu aio ao mani kona naba ni kaitibo iai ni koaua ma te Uea.

Te makuri ni mitinare ae kororaoi e na bon kainnanoa te maiu inanon te aki kaubai ma te nanorinao ao te tauraoi ni kona ni kitana aromi ni mwengaraoi. Ma ae kakannato riki bon te maiu n ongotaeka ao te tauraoi n nako ike E kairi ngkami iai te Uea, n aiaron Betero are e ongotaeka iroun Iesu ni kabaka te karauna n aron are e tuangaki. Te aki kaubai, te ongotaeka ao te nanorinano bon ngaia ae na angani ngkami te kona n rooti ao n ringii maeuia aomata ake kam na karokoa irovia ana tangira, ana nanoanga ma makan ana kamaiu te Uea.

#### *5. Riki ba taan boutoka karekean te Eti ao te Riai*


Teimatoa n riki ba taan boutoka te Eti ao te Riai ao tauraoi ma te ninikoria n tei bukin te koaua ma te eti inanon te aro n tauataeka, te Ekaretia, te kawa ma taian utu. Tauraoi ni n noori taian kairua ake kam a tia ni karoai nakon temanna ma temanna ao nakon te Ekaretia ao manga karekea te aro ni kaiokaki ae tamaraoa ma aomata n aron nanon te Uea.

#### *6. Karikirakea ami tangira ae nano ma Nei Maria*

Aron tangiran ma ingaingan nanomi ni kan kakororaoa raoi aron maeuakinan nakoami ni Berebitero e na reke ma ana ibuobuoki tinara Nei Maria. Ngkai e a tia naba Nei Maria n anganaki te ara iroun tinara te Ekaretia ba Tinaia Berebitero, e bon riai ba kam na karekea nnen Nei Maria n taai nako i nanomi ao ni maeumi. Reitaki ni koaua ma Nei Maria ae Ana Toro te Uea ae Mangori inanon karaoaan kanoan nakoami ni Berebitero ao bubutia Nei Maria ana kakawakin nakoimi n taai nako.

#### *7. Kabongana raoi te tai ibukin te Uea*

Boni ngaira ni kabane taan borau n te maiu aei aika ti kekeiaki ba ti n roko n tokin kawaira are irarikin Iesu inanon te kabai ma te mimitong. Te tai aio bon te bai ae ti anganaki mairoun te Atua ao bon tabera ae kakawaki ba ti kabongana raoi te tai aio n aron nanon te Uea. N tokin maeura ao e na bon tuoaki ba ti kanga ni kabongana te tai are ti anganaki. Ti bia bane n tauraoi ma te ingainga n nano ni kaitara te tai anne ao ni kaiti nakon Uea te tai ari kekeiaki aika ti a tia ni karoai. Aron bairean taekara e na bon kaineti ma aron te muioko are ti anganaki ni maeura aio. Bon ara kantaninga ba kam na tauraoi ara berebitero ni butimaai kaoti n ibuobuoki aikai ba E aonga Iesu are te Berebitero are Moan te Rietata n aki toki ao te Tia Kawakin Tibu ni koaua n anganira kawangara ae tamaraoa ni kona ni maeka irarikina i Karawa inanon te mimitong ae akea tokina.



*"Maiuakina te aki  
kaubai, te nanorinano  
ao te ongotaeka...."*



## Mataku... Tamnei, Inanon Te Bakate nua te bong aio 2010.



Aia mare tanga aika a boou imuin kainakin te charismatic inanon wiikin te bakate, mai Betio Parish



Ana boutoka Katekiti Roobati ibukin Tirotaamteeti ni karoan te mare aio.



Ana Tutia n reitaki te charismatic ae banin iaon Tarawa n tain te Toa ae Bentekota. E kairaki iroun Fr Koru



Taan kainaomataki ae e nakon angaun tabun (40+) maitia man taian parish aika 3 (Bikenibeu, Teaoraereke ao Betio) inanon Toan te Bentetoka




Aia maie ni katituaraoi kain  
Betio Parish inanon te Toa ae  
Bentetoka



Taan kainaomataki ae e nakon  
angaun tabun (40+) man taian  
parish aika 3 (Bikenibeu,  
Teaoraereke ao Betio) inanon  
Toan te Bentetoka

E kaira te kainaomata Fr Koru



Taan kainaomataki ae e nakon  
angaun tabun (40+) man taian  
parish aika 3 (Bikenibeu,  
Teaoraereke ao Betio) inanon  
Toan te Bentetoka



Te kukurei n rawetamnei ma  
Tinara ae Nei Maria imuin te  
Tutia n tain Bentetoka

*A rineaki tarira ao  
manera aika boou iroun  
Te Uea ba taan buaka*





## Reitan te Tamnei



Aia uakarea kaain Betio Parish n tain aia kairi Tutia. Ana tutia n reitaki te charismatic ma Fr Koru n te Umantabu are e tuai n tia i Beteriin, Ambo



Aia kainaomata tarira ma manera man Bikenibeu Parish are e karaoaki n te tutia n reitaki n te Umantabu i Beteriin

*E raba te Uea ibukia  
manera ao tarira aika  
bati ake tia tia n  
anganaki inanon te  
ririki aio*



Te nebobebo n ribano n tain karietan te Eukari inanon te tutia i Beteriin



Ana katokabai Fr Koru iaoia tarira ao manera ake a tiba rin naba n te botaki ae te charismatic